

ԵՐԵՎԱՆԻ ԿԱԿԱՐԱՆ

ՄԱՅՐ ԱԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄԵԿՎՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց



Հունիսի 17-ին «Սուս Արևելքի քրիստոնյաներ» կազմակերպության պատվիրակությանը

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսն ընդունեց «Սուս Արևելքի քրիստոնյաներ» կազմակերպության գլխավոր տնօրեն Բենեմին Բլանշադի գլխավորած պատվիրակությանը։ Ողջունելով հյուրերի այցը հայոց հոգևոր կենտրոն՝ Ամենայն Հայոց Կաթողիկոսն իր գնահատանքը հայտնեց կազմակերպությանը՝ Հայաստանին և հայ ժողովրդին ցուցաբերվող աջակցության համար։ Զրույցի ընթացքում Նորին Սրբությունը գոհունակությամբ անդրադարձավ Սուրբ Էջ-

միածնի և կազմակերպության միջև ձևավորված գործակցությանը, որի արդյունքում արդիականացվում է Մայր Աթոռի տպարանը։ Իր հերթին պարոն Բենեմին Բլանշադը Հայոց Հովվապետին տեղեկություններ փոխանցեց «Սուս Արևելքի քրիստոնյաներ» կազմակերպության գործունեության մասին՝ ի մասնավորի անդրադառնալով Հայաստանի տարբեր մարզերում իրականացվող կրթական, գյուղատնտեսական, առողջապահական, ինչպես նաև քրիստոնեական և մշակութային հուշարձանների վերականգնմանն ուղղված ծրագրերին։

Իր օրհնությունը բերելով ուխտավոր հայորդիներին՝ Հայոց Հայրապետը գոհունակությամբ անդրադարձավ պոլսահայ համայնքի ամուր հավատքին, ծառայանվիրումին, եկեղեցասիրությանը և Մայր Աթոռ Սուրբ Էջմիածնի նկատմամբ ունեցած

անվերապահ սիրուն։ Այս առիթով Նորին Սրբությունը հորդորեց պոլսահայ ուխտավորներին մույն ճախանձախնդրությամբ զորացնել իրենց հավատքն առ Աստված, սերն առ մայր եկեղեցին և պահպանել ազգային ինքնության գիտակցությունը։



Հունիսի 25-ին ԱՄՆ-ի հայոց արևմտյան թեմի ուխտավորներին

Ամենայն Հայոց Կաթողիկոսն ընդունեց ԱՄՆ-ի հայոց արևմտյան թեմի Փասադեյի Սուրբ Գրիգոր Լուսավորիչ եկեղեցու համայնքի ուխտավորներին՝ առաջնորդությամբ հոգևոր հովիվ Տ. Սարգիս ավ. քնն. Պետոյանի։ Իր սերն ու օրհնությունը փոխանցելով ուխտավորներին՝ Վեհափառ Հայրապետը կարևորեց աշխարհասփյուռ հայոց թեմերից մանա ուխտագնացությունների կազմակեր-

պումը, ինչը հնարավորություն է ընձեռում իրենց ուխտը Սուրբ Էջմիածնում մորթելու, ինչպես նաև հաղորդ դառնալու հայրենիքում առկա մարտահրավերներին և իրենց զորակցությունը բերելու հայ ժողովրդին այս ծանր օրերին։ Հայոց Հովվապետը պատգամեց ուխտավորներին զորանալ առ Աստված հավատքով, կրթել ու դաստիարակել իրենց զավակներին աստվածաշնչությամբ, եկեղեցասիրությամբ ու հայրենասիրությամբ։



Հունիսի 19-ին Կ. Պոլսի Հայոց Պատրիարքության ուխտավորներին

Ամենայն Հայոց Կաթողիկոսն ընդունեց ուխտավորաբար Հայաստան ժամանած Կ. Պոլսի Հայոց Պատրիարքության Բեյոզլու շրջանի հայկական համայնքի վարչական և թաղային խորհրդի անդամներին՝ ուղեկցությամբ Բեյոզլու շրջանի հայկական եկեղեցիների հոգևոր տեսուչ Տ. Հարություն

վոր. Տամատյանի և թաղային խորհրդի ատենապետ տիար Աբսել Թոփալյանի։ Հանդիպմանը հայր սուրբը, Նորին Սրբությանը ներկայացնելով ուխտավորներին, տեղեկություններ փոխանցեց Ստամբուլի Բեյոզլու շրջանի հայկական համայնքի գործունեության մասին։



Հունիսի 26-ին Վերապատրաստման դասընթացների մասնակից եկեղեցականներին

Ամենայն Հայոց Կաթողիկոսն ընդունեց երեքշաբթյա վերապատրաստման հերթական դասընթացներին մասնակից քահանաներին։ Հանդիպմանը Մայր Աթոռ Սուրբ Էջմիածնի «Գարեգին Ա» կրթական կենտրոնի տնո-

րեն Տ. Վահան եպս. Հովհաննիսյանը Հայոց Հովվապետին ներկայացրեց Հայաստանի և Սփյուռքի տարբեր թեմերից Մայր Աթոռում մեկտեղված հոգևորականներին, անդրադարձավ վերապատրաստման դասընթացների արդյունավետությանը։ ➔ էջ 2

Ամենայն Հայոց Կաթողիկոսն ընդունեց

Վերապատրաստման դասընթացների մասնակից
եկեղեցականներին

← էջ 1

Այնուհետև հոգևոր հայրերին ողջունեց և իր հայրական օրհնությունը բերեց Նորին Սրբությունը՝ ընդգծելով դասընթացների կարևորությունը ու օգտակարությունը հոգևորական ծառայության առավել արդյունավորման համար:

Ամենայն Հայոց Կաթողիկոսն այս դասընթացները պատեհ առիթ նկատեց նաև հաղորդ դառնալու հայրենիքում առկա դժվարություններին և միասնաբար խորհրդածելու ազգային կյանքը հուզող խնդիրների շուրջ: Նորին Սրբությունը մասնավորաբար մտահոգություն արտահայտեց երկրի առջև ծառացած անվտանգային մարտահրավերների, արցախահայերի սոցիալական խնդիրների և ազգային կյանքում անհամ-

դությունության ու թշնամանքի վտանգավոր դրսևորումների ամենաբարձր: Հայոց Հայրապետը հորդորեց քահանա հայրերին իրենց պատասխանատվության ներքո գտնվող համայնքների ներգրավմամբ լծվել առկա հիմնախնդիրների հաղթահարմանը, հայրենիքի զորացման և շենացման գործին:

Իր զննահատանքը բերելով եկեղեցականներին՝ Հայոց Հոգևորապետը գոհունակությամբ հաստատեց, որ հոգևոր դասի նվիրյալ ծառայության շնորհիվ այսօր առավել զորանում է եկեղեցու առաքելությունը ժողովրդի կյանքում:

Նորին Սրբությունը նաև պատասխանեց քահանաների հարցերին, որոնք առնչվում էին եկեղեցու կանոնական, ծիսական և հովվական կյանքին:



Հունիսի 27-ին ԱՄՆ-ի հայոց արևելյան թեմի ուխտավորներին

Ամենայն Հայոց Կաթողիկոսն ընդունեց ԱՄՆ-ի հայոց արևելյան թեմի Մասաչուսեթս նահանգի Ուստրի Սուրբ Փրկիչ եկեղեցու համայնքի ուխտավորներին՝ առաջնորդությամբ հոգևոր հովիվ Տ. Թադեոս քնն. Բարսեղյանի:

Հայցելով Վեհափառ Հայրապետի օրհնությունը՝ տեղ Թադեոսն ընդգծեց, որ ուխտավորները Հայաստան և Մայր Աթոռ Սուրբ Էջմիածին են այցելել իրենց ուխտը վերանորոգելու և հայրենիքի հետ կապը զորացնելու համար:

Հայոց Հոգևորապետը, իր հայրական սերն ու օրհնությունը փոխանցելով ուխտավորներին, կարևորեց Սփյուռքի հայորդյաց զորակցությունը իրենց հայրենաբնակ քույրերին ու եղբայրներին՝ Հայաստանի համար այս ծանր և դժվարին ժամանակաշրջանում:

Նորին Սրբությունը արձանագրեց, որ Ցեղասպանությունը վերապրած հայորդիները, բնակություն հաստատելով ԱՄՆ-ում, հա-

վատքով ու լավատեսությամբ ոգով վերակերտել են ազգային կյանքը և համախմբվելով եկեղեցու շուրջ՝ պահպանել իրենց ինքնությունը: Հայրապետը նկատեց, որ Ուստրի հայ համայնքը, լինելով հնագույն ԱՄՆ-ում, դրա գերիվեր վկայությունն է: Ամենայն Հայոց Կաթողիկոսն ընդգծեց, որ մեր ժողովուրդը նույն հավատքով ու զորեղ կամքով, համագործակցելով միասնականությամբ ի զորու է դիմագրավել մերօրյա բոլոր դժվարություններն ու փորձությունները, ամրապնդել հիմքերը Հայոց անկախ պետականության, հետամուտ լինել տեղահանված արցախահայության իրավունքների պաշտպանությանը: Հանդիպմանը Վեհափառ Հայրապետը նաև պատգամեց ուխտավոր հայորդիներին առավել աշխուժացնել համայնքային կյանքը՝ կրթելով ու դաստիարակելով իրենց զավակներին հոգևոր-ազգային արժեքներով, ամրապնդելով նրանց սրտերում սերն ու նվիրումը հայրենիքի և Հայոց եկեղեցու նկատմամբ:

Հունիսի 29-ին

«Իզմիրլյան» ԲԿ-ի տնօրենությանը
և բուժանձնակազմին

Ամենայն Հայոց Կաթողիկոսն ընդունեց «Իզմիրլյան» բժշկական կենտրոնի տնօրենությանը և բուժանձնակազմին՝ գլխավորությամբ ԲԿ-ի գործադիր տնօրեն Կարեն Բաբայանի, Բ. Գ. Դ. Արմեն Չարչյանի և առաջնորդությամբ կենտրոնի հոգևոր տեսուչ Տ. Հովհաննես արք. Թորգոմյանի:

Հանդիպմանը Վեհափառ Հայրապետն իր օրհնությունն ու զննահատանքը բերեց ներկայից առողջապահության ոլորտում իրենց ազգաշահ և աստվածահաճ առաքելության համար՝ գոհունակությամբ ընդգծելով, որ վերջիններս իրենց մասնագիտական կարողություններն ու հմտությունները ծառայեցնում են ի խնդիր բուժման կարիք ունեցող անձանց ապաքինման:

Հայոց Հոգևորապետն ընդգծեց, որ եկեղե-

ցին հոգեփրկական իր առաքելության ճանապարհին մշտապես կարևորել է անձի ֆիզիկական առողջությունը՝ իբրև պայման աստվածաշնորհի կյանքը լիարժեքորեն ապրելու և բարի գործերով առավել արժևորելու: Այս առնչությամբ Նորին Սրբությունը, անդրադառնալով «Իզմիրլյան» բժշկական կենտրոնի գործունեությանը, նկատեց, որ կենտրոնը, լինելով Մայր Աթոռ Սուրբ Էջմիածնի հովանու ներքո գործող հաստատություն, կոչված է առավել մեծ պատասխանատվությամբ ու նվիրումով իր անսակարկ ծառայությունը մատուցելու ազգի զավակներին: Վերջում Ամենայն Հայոց Կաթողիկոսը Աստծու օգնականությունն ու զորակցությունը հայցեց բուժաշխատողներին՝ իրենց երախտարժան առաքելության մեջ:



Հունիսի 30-ին

ՀԲԸՄ-ի Գլխավոր առաջնորդության ծրագրի
մասնակից ուսանողներին

Ամենայն Հայոց Կաթողիկոսն ընդունեց Հայկական բարեգործական ընդհանուր միության (ՀԲԸՄ) Երևանի Գլխավոր առաջնորդության ծրագրի մասնակից ուսանողներին՝ գլխավորությամբ ՀԲԸՄ-ի Սփյուռքի երիտասարդական ծրագրերի տնօրեն տիկին Գայանե Մանուկյանի:

Հանդիպմանը տիկին Մանուկյանը Նորին Սրբությանը ներկայացրեց ՀԲԸՄ-ի Գլխավոր առաջնորդության ծրագիրը, որի շրջանակներում աշխարհապաշտպան հայ երիտասարդները հնարավորություն են ստանում մասնագիտական և գործնական փորձառություն ձեռք բերելու հայրենիքում, ինչպես նաև ծանոթանալու հայ մշակույթին և հոգևոր ժառանգությանը:

Այս ներկայացումն իր օրհնությունն ու պատգամը բերեց Ամենայն Հայոց Կաթողիկոսը՝ բարձր գնահատելով Հայկական բարեգործական ընդհանուր միության կողմից իրականացվող մանաստիպ ծրագրերը, որոնց շնորհիվ տարբեր երկրներում հասակ առած հայորդիները հնարավորություն են ստանում համախմբվելու հայրենիքում,

հարստացնելու իրենց մասնագիտական փորձառությունը և հաղորդ դառնալու հայրենի իրականությանը:

Հայոց Հայրապետը վստահություն հայտնեց, որ հակառակ երկրում առկա մարտահրավերների՝ հայրենիքից ստացած տպավորությունները մերձհանգիստ մոտ աղբյուր կդառնան երիտասարդների համար՝ առավել զորացած վերադառնալու իրենց համայնքներ և շարունակելու իրենց առաքելությունը ազգային կյանքում: Այս առնչությամբ Նորին Սրբությունը հորդորեց երիտասարդներին եռանդազին ներգրավվել հոգևոր-եկեղեցական կյանքի մեջ, ամուր պահել սերը հայրենիքի նկատմամբ, իրենց ձեռք բերած գիտելիքներով օգտակարություն բերել ինչպես տեղի հայ համայնքներին, այնպես էլ հայրենիքի բարօրությանը:

Վերջում Վեհափառ Հայրապետը պատասխանեց ներկայից հարցերին, որոնք վերաբերում էին եկեղեցու կրթական ծրագրերին, հայրենիքի առջև ծառացած մարտահրավերներին ու դրանց հաղթահարմանը:

Տեղի ունեցավ Գևորգյան հոգևոր ճեմարանի 2023—2024 թթ. ուսումնական տարվա փակումը

Նունիսի 28-ին Ն. Ս. Օ. Տ. Տ. Գաբրիել երկրորդ Ծայրագույն Պատրիարք և Ամենայն Հայոց Կաթողիկոսի նախագահությամբ Մայր Աթոռ Սուրբ Էջմիածնում տեղի ունեցավ Գևորգյան հոգևոր ճեմարանի՝ 2023—2024 թթ. ուսումնական տարվա փակման հանդիսությունը:

Միջոցառումն սկսվեց Տերունական աղոթքով, որից հետո հնչեցին ՀՀ և Գևորգյան հոգևոր ճեմարանի օրհներգերը: Այնուհետև ներկայից Նորին Սրբությանը հոգևոր ճեմարանի և Սևանի Վազգենյան հոգևոր դպրանոցի տեսուչ Տ. Շահեն Ժ. վրդ. Ամանյանը:

Հայր սուրբը, անդրադառնալով եկեղեցու և հայ ժողովրդի կյանքում ճեմարանի ունեցած նշանակությանը, ուրախությամբ արձանագրեց, որ 2023—2024 և գալիք՝ 2024—2025 ուսումնական տարիները նշանավորում են Գևորգյան հոգևոր ճեմարանի հիմնադրության մեկուկեսդարյա հոբելյանը:

«Հայոց Սրբություն Սրբոց Մայր Աթոռ Սուրբ Էջմիածնում հիմնադրված ու այդ կենսավետ ավիշից սնվող այս հաստատության պատմությունն այլևս չափվելու է դարերով... Գևորգյան ճեմարանի հիմնադիր Գևորգ Դ Մեծագործից մինչև ազգիս Ամենայն Հայոց Կաթողիկոս Գարեգին Բ շինարար հայրապետների խնամող շնչով ու հեռահայաց տեսիլքով է կերտվել և կերտվում դարավոր այս ավանդույթը, նրանց հայրական շունչն է, որ հաստատում է պահում մեր բոլորիս սիրելի Գևորգյան ճեմարանը: Նրա սրբազան կամարների տակ հասակ առած մեծերն են հյուսել ճեմարանական կրթության պատկեր, որն այսօր մեր վտիտ ճակատներին ենթ կրում՝ որպես ճեմարանավարտ հոգևորականներ», — ասաց հայր Շահեն:

Վերջում տեսուչ հայր սուրբն իր երախտագիտությունը հայտնեց Ամենայն Հայոց Հայրապետին՝ ճեմարանի նկատմամբ ցուցաբերվող

հայրական հոգածության և ուշադրության, ինչպես նաև ճեմարանի ուսուցչական-դասախոսական կազմին՝ իրենց նվիրյալ աշխատանքի համար:

Գևորգյան հոգևոր ճեմարանի երգչախմբի կատարումներից հետո դասախոսների ամուսնից ներկայից խոսք ուղղեց պատմ. գիտ. թեկնածու Արսեն Հարությունյանը, իսկ ուսանողության ամուսնից սրտի խոսք ասաց Զ-րդ լսարանի սան Տոմոս սրկ. Ղազարյանը:

Հանդիսության ընթացքում Հայոց Հայրապետը պարգևներ հանձնեց ուսման մեջ բարձր առաջադիմություն արձանագրած ուսանողներին:

Ցերեկույթն ամփոփվեց Ամենայն Հայոց Կաթողիկոսի հայրական պատգամով ու օրհնությամբ: Նորին Սրբությունը գոհունակությամբ ընդգծեց, որ Մայր Աթոռի տարեգրության մեջ արձանագրվել է արդյունավոր ուսումնառության, գիտելիքների

ամբարման և հոգևոր զարգացման ևս մեկ տարի: Անդրադառնալով ճեմարանի 150-րդ տարեդարձին՝ Վեհափառ Հայրապետն արձանագրեց. «Մեծ հոբելյանը մեկ անգամ ևս մեզ հիշեցնում է հոգևոր-կրթական հաստատությունների կոչման ու առաքելության և դարավոր ավանդների պահպանության կարևորությունը: Գևորգյան հոգևոր ճեմարանի հիմնադիր Գևորգ Դ Հայրապետը, ինչպես մշտապես մեր եկեղեցին, կրթության մեծ ջատագովն ու խրախուսողն էր, առավել ևս՝ հոգևոր կրթության, որը պայման է բարոյական արժեքներով առողջ հասարակության կազմավորման, մարդկային կյանքի աստվածօրհնյալ ընթացքի»: Նորին Սրբությունը հավելեց, որ մեկ և կես դար շարունակ Գևորգյան ճեմարանը՝ հակառակ հայ ժողովրդի ապրած ծանր տարիների և կրած մեծ դժվարությունների, կրթել է արժանավոր եկեղեցականների

և մտավորականների, ովքեր ազգային կյանքում վառ են պահել հոգևոր լույսի ջահը, առաջնորդել ազգի զավակներին և զարկ տվել նրանց առաջադիմությանը: Հայոց Հոգևորապետն ընդգծեց նաև հոգևորականների առաքելության կարևորությունը ներկա ժամանակներում. «Հայրենի մեր երկրի առջև այսօր ծառացած արտաքին և ներքին մարտահրավերները, հայրենիքում և սփյուռքի համայնքներում տիրող անհամընդունելի դրսևորումները, ազգային արժանապատվության շարունակ ոտնահարման և խորացող հուսալքության մտահոգիչ երևույթները, ապագայի շուրջ համընդհանուր հեռանկարի բացակայությունը վկայում են, թե որքան բարդ և խորն են հիմնախնդիրները, որով և՛ մեծ ու բազմազան սպասումները Հայ եկեղեցուց և եկեղեցականությունից: ➔ էջ 3

Տեղի ունեցավ Գևորգյան հոգևոր ճեմարանի 2023—2024 թթ. ուսումնական տարվա փակումը



← էջ 2
...Ամտարակույս, մեր կյանքի հավատավոր ու հայրենասեր ընթացքով, անձնորդի, բոլորամյակ ծառայությամբ ու սկզբունքային կեցվածքով պիտի լուծուներ ստանան մեր ժողովրդի առջև ծառացած ներկա բարդ ժամանակների խնդիրները, վերացվեն

մոլորեցնող գործողություններն ու երևույթները և հաղթահարվեն աստվածամերժ ու կորստաբեր ընթացքները հայրենական մեր կյանքում: Հավատում ենք, որ իբրև եկեղեցի՝ մեր Տիրոջ առաջնորդությամբ և մեր ժողովրդի միասնական ջանքերով, անպարտ ու զորավոր ոգով պիտի կարողանանք գտնել դեպի խաղաղ ու ապահով հանգրվաններ առաջնորդող ուղիները:



Ամենայն Հայոց Կաթողիկոսը մեզ շնչեց, որ մեր երկրին պատուհասած փորձությունները հնարավոր է հաղթահարել միայն առ Աստված ապավինությամբ ու ազգային միասնությամբ, ամուր պահելով հավատը, քրիստոնեական արժեքներով զորացնելով ու վեր բարձրացնելով մեր կյանքը



Ամավերջյան փակման հանդիսությամբ առիթով Հայոց Հայրապետն իր գնահատանքը հայտնեց տեսչական անձնակազմին և դասախոսներին՝ թելադրելով վերջիններիս հոգևոր կրթությամբ հղի ու

միտքն ու հոգին, ամուր պահի հավատի, ինչպես նաև անմահանջ՝ ժողովրդին ու հայրենիքին ծառայելու սրբազան կոչման մեջ: Վերջում Գարեգին Երկրորդ Հայրապետն աղոթք բարձրացրեց առ

ՔՐԻՍՏՈՆՆԵՈՒԹՅՈՒՆԸ ԵՎ ՀԱՅ ՄՇԱԿՈՒԹՅՈՒՆԸ

Աստվածամոր կերպարը Ավետիս Ահարոնյանի «Մայրերը» պատմվածքում

Ավետիս Ահարոնյանը (1866—1948) հայ գրականության և հասարակական-քաղաքական կյանքի մեծ երախտավորներից է: Նա Գևորգյան հոգևոր ճեմարանի շնորհալի սաներից էր (ճեմարանական ուսումը կիսատ է թողել աչքերի տկարության պատճառով): Այդ տարիներին Ա. Ահարոնյանի հետ ճեմարանի սաներ էին Ա. Իսահակյանը, Լ. Շանթը, Կոմիտասը, Մ. Աբեղյանը, Գարեգին Հովսեփյանը, մասնաճյուղի ազատագրական շարժման որոշ ներկայացուցիչներ: Հետագայում Ահարոնյանը Բուստոնի «Հայրենիք» համադրական հրատարակեց «Իմ գիրքը», որտեղ մի ամբողջ գլուխ նվիրեց ճեմարանին, իր ուսուցիչներին ու ճեմարանական ընկերներին:

Գրողի քրիստոնեական մտածելակերպը, հոգեկերտվածքը սկսեցին ձևավորվել դեռ մանկուց մոր՝ Զարգարի շնորհիվ: Մայրը որդուն հայերեն էր սովորեցնում Նարեկով և Սաղմոսով: «Իգործմասցի այդ պատանին իրենց գիտի ծաղիկներու հոտով մեծցած էս Լիարատի շուքը իր լայն ճակատին՝ դարձաւ հայ մեծ գրագետը իր ինքնուրույն ոճով» («Բագին» ամսագիր, թիւ 8—9, Պեյրուք, 1966, էջ 20, 22):

Ահարոնյանի ուշագրավ պատմվածքներից է «Մայրերը», որը գրեց 1902 թ.: Գրողը պատմվածքն սկսում է եկեղեցում պալան առ պալան բարձրացող խունկի և քահանայի՝ աղոթք մրմնջալու պատկերով: Պատկերակերտման այդքան տպավորիչ և գեղեցիկ արվեստին, անշուշտ, նպաստել է նաև ճեմարանի ազդեցությունը: Պատմվածքի գեղագիտական նպատակն է վեր հանել Աստվածամոր կերպարը և հակադրել տարիքավոր կնոջ՝ Սուսանի կերպարին: Աստվածամայրն ու այդ կինը փորձում են հասկանալ միմյանց մտքերը: Ահարոնյանը ցույց է տալիս, որ Տիրամայրը վերևում է՝ սյան վրա. «...սևացած սեան վրայ կախուած էր Աստուածածնի նկարը մի մզլած, դեղնած շրջանակի մէջ», Սուսանը ներքևում՝ գետնի վրա: Մեկը սուրբ է, կարող, հրաշագործ, մյուսը՝ խեղճ, վշտահար: Աստվածամայրն իր Միածնի փոքրիկ, գանգրահեր գլուխը սեղմել է կրծքին և ժպիտով նայում է ներքև՝ բազմությանը: Գրողն ամբողջությամբ պատկերում է նկարը՝ շրջանակի վրա դնելով վեց մեղրամոմ, որ վառվում էին և իրենց խորհրդավոր լույսով աղոտ փայլ տալիս Տիրամոր հեզ դեմքին ու փոքրիկ Քրիստոսի ձյունափայլ մարմնին. «Այդ փայլի մէջ լողում էր, ինչպէս մուգ լճի վրայ վաղորդեան մշուշի մէջ լողացող սպիտակ կարապը» (էջ 5):

Հետաքրքրական է, թե հեղինակն ինչ ձևով է խունկի ծուխը ներկայացնում: Այն չորս կողմից Աստվածամոր և Զավակի շուրջն է պտույտներ անում, կարծես աշխատում է վեր տանել այդ երկնային զույգին: Պատմվածքում Տիրամոր պատկերից չեն հեռանում Սուսանի արտասովոր աչքերը: Տիրամոր պատկերի մոտ տարիներ շարունակ այդ կինը կրակի, ցավի, պաղատանքի խոսքեր է ասել և աղոթել: Իր կրկնվող աղոթքի մեջ նա միշտ դիմում է հետևյալ բառերով՝ «սուրբ Տիրամայր», «բոլոր ցաւոտ սրտերի, վշտացած հոգիների, մոլորացող մայրերի գթոտ մայր», «անճարների մայր», «ողորմած թագուհի», «ողորմած մերիկ» և այլն:

Ա. Ահարոնյանն ստեղծում է այնպիսի պատկեր, որը տաճարն է «ներքի» կնոջ մոլորացող սրտի բռնկմանը՝ առաջացնելով նախանձ. «Փրկիր նրան, իմ զաւակին, Տիրամայր,

բարեխօս եղիր Նրա մօտ, որ այնպէս սիրով գրկել, սեղմում էս քո սուրբ կրծքին. տես՝ Նա ինչպէս փարում է քո մայրական ստիճքներին, ինչպէս ուզում է լսել քո սրտի ձայնը, մայր, մայր, ախր ես էլ եմ մայր, ես էլ սիրտ ունեմ, կուրծք ունեմ...» (էջ 8—9):

Տիրամոր սիրտը լայն է, սերը՝ անչափ: Գրողն իր պատմվածքում մասնադառնում է բոլոր մարդկանց սրտի ցավերի բուժմանը, այսինքն՝ կնոջ կերպարի մեջ ամփոփում է համամարդկային խնդիր: Սպասող կինն աղաչում է, որ նախ Աստվածամայրը հասնի ուրիշ խեղճերին, նեղյալներին, ամենավերջում միայն լսի իր ձայնը:

Աստվածամորը և Քրիստոսին ամբողջ պատմվածքում հետևում է ներքևում հայացքը պատկերին հառած կինը, մույնիսկ այն ժամանակ, երբ մոմերը մեկիկ-մեկիկ այրվում են, մարում, իսկ երկնային զույգի դեմքերը կորչում են խավարի մեջ, եկեղեցին դատարկվում է: Հեղինակը կերպարի աղոթող շուրթերով ասում է, որ նա էլ մայր է, սիրտ ունի, սրտի մրմուռը կհասկանա, մի հնար կանի: Ջերմեռանդ աղոթող կնոջը քահանայի խոսքի ժամանակ Տիրամայրը ժպտում է: Սա առիթ է դառնում, որ կնոջ սրտում հույսը վարդի պես բացվի:

Աստվածածնի հետ անընդհատ երկխոսության մեջ է պատմվածքի կինը. կարծես թե տեսնում է և փորձում լսել նրա պատասխանը: Վշտից կեղեքված հերոսուհին սկսում է մեղադրել եկեղեցուն՝ ասելով, որ ամեն օր դուռը գնաց, մատները տրորեց մոմ վառելով: Այս դեպքում քահանան միջնորդ է լինում «ներքևի և վերևի կնոջ» միջև: Քահանան փորձում է բացատրել, որ Աստված հավանաբար ուզում էր, որ նա չհիմանար որդու մահը: Տիրամոր ժպիտն սկսում է պատմվածքի հերոսուհուն վշտացնել: Նա մտածում է, թե խաբել է Տիրամայրը, և գոնե երազով հայտնել կնոջը, որ իր արևը խավարել, օջախը մարել է:

Քահանան ցույց է տալիս Ավետարանի երեսին պատկերված խաչելությունը: Ասում է, որ այստեղ մույն Տիրամայրն է պատկերված՝ իր խաչված Քրիստոսի ոտքերի տակ, և սգում է: Քահանան բացում է կնոջ աչքերը՝ ասելով, որ նա միայն երջանիկ Տիրամորն է տեսել, ուրեմն պիտի տեսնի նաև այս սգավոր, դժբախտ Տիրամորը, որի սիրտը քանի տուր է մտել. չէ՞ որ նրա Որդին է խաչված վերևում՝ մեր բոլորի և աշխարհի փրկության համար: Աստվածամայրը կին է, մայր. նա բարի է, գթասիրտ: Նա է, որ Որդու առաջ բարեխոս է լինում մարդկանց անթիվ մեղքերի համար:

Ահարոնյանի պատկերած հերոսուհին՝ Սուսանը, աղոթող կերպար լինելով, խելագարվում է, չարամում, բայց և իրեն վերագտնում՝ հասկանալով, որ Տիրամոր ցավն ավելի մեծ է: Գրողը փորձում է ցույց տալ, որ բոլորից մեկը՝ հասարակ գյուղացին, հարածամ աղոթքի մեջ էր եկեղեցում և խունկի ծուխն իր վրա վերցնելով՝ խնդրում էր Աստվածածնին բոլորի համար, վերջում՝ իր համար: Սա մի տեսարան է, որն անընդհատ հետևում է ընթերցողին:

Հայ գրականության մեջ մասնադառն Սևակն է «Բարեխոս եղիր իմ և իմ միջև» բանաստեղծության մեջ օգնություն խնդրում Մարիամից, նրա բարեխոսությունը ցանկանում: Եթե համեմատելու լինեմք այս երկու գործերը, ապա կտեսնենք, որ երկու հեղինակներն էլ փորձում են իրենց գործերում



Հովհաննես Խաչատրյան, «Միջոտինյան Տիրամայր», 1512—1513 թթ.

գտնել ինքնահաշտություն, մասնադառն իր հաշտություն. «Օգնիր ինձ, Մարիամ, // Եվ ասեմ ինձնով, // Բարեխոս եղիր իմ և իմ միջև, // Որ բանն ավարտվի ինքնահաշտությամբ»: Պոլսահայ բանաստեղծներից Զահրատը մույնպես ունի Աստվածածնի պատկերի առաջ մոմ վառելու տեսարան ներկայացնող բանաստեղծություն՝ «Երկու հատ մոմ» վերնագրով: Ուշագրավ բառամթերքով պոլսահայ բանաստեղծը մեզ ներկայացնում է իր խոսքը Տիրամոր պատկերի առջև: Նա ասում է, որ եթե մոմ վառելով բավարարված է զգում Տիրամայրն իրեն, եթե մոմով կատարվելու են իր իղճերը, ապա թող լինի այնպես, որ քայլ առ քայլ հասնի երջանկության: Նա կարծես թե երկխոսության մեջ է մտնում Աստվածամոր հետ՝ ասելով, որ նա գիտի, թե իրեն ինչ է պետք երջանիկ լինելու համար: Զահրատը նորից հիշեցնում է Տիրամորը, որ այդ երկու մոմերից մեկն ինքն է.

Այդ մյուս մոմն ալ հավանաբար կճանցնաս, թե որումն է, Ամոր մասին շատ եմ խոսեր քեզի հետ, Ան գուցե Աստվածամոր կամ Աստուծո մասին շատ բան չի գիտեր,

Բայց հոգ չէ և կամ ան Սա վարկյանիս լուր չունի, թե մոմ մըն ալ իրեն համար կառնեցի:

Զահրատը բանաստեղծության մեջ երկու անգամ կրկնում է «Աստվածամայրս իմ դուռն» արտահայտությունը, որը մասնադառն է Ահարոնյանի պատմվածքում: Այսպիսով՝ Ահարոնյանն իր պատմվածքում վեր հանեց Տիրամոր կերպարը և ցույց տվեց մոր իրական կյանքը: Պատրաստեց ՕՖԵԼՅԱ ԳԱՍՊՐԱՅԱՆԸ

Պայքար ընդդեմ Հայոց Եկեղեցու պատմության իմացության

Հարցազրույց պատմաբան Արման Մալոյանի հետ

— 2018 թ. Հայաստանի հանրակրթական դպրոցներում քննարկումներ սկսվեցին «Հայոց Եկեղեցու պատմություն» առարկայի դասավանդման նպատակահարմարության շուրջ: Առաջ էին քաշվում հարցադրումներ, որ դասընթացը պետք է տարրալուծել այլ առարկաներում կամ սահմանափակվել՝ մեկ-երկու դասարանում դասավանդելով: 2021-ին հաստատվեց հանրակրթության պետական չափորոշիչը: Հետո ԿԳՄՍ նախարարությունը որոշեց, որ 2023–2024 ուսումնական տարվանից «Հայոց Եկեղեցու պատմությունը» որպես առանձին առարկա, չի լինելու և ներառվելու է «Հայոց պատմություն» առարկայի դասագրքերում: Ըստ Ձեզ՝ ի՞նչ քաղաքականություն է դա, մեզ որոշման անհրաժեշտություն կարո՞ղք:

— Նախ պիտի ասեն, որ մասնագիտական ոլորտում մեզ որոշում կայացնելու համար անհրաժեշտ էր, որ առարկան դասավանդող ուսուցիչներին, մասնավորապես հայոց եկեղեցու պատմության տնօրենության, ծնողների, սովորողների շրջանակներում հարցախույզ արվեր, տեսակետները վերահամընդունվեին և վերլուծություններ կատարվեին, այնուհետև համապատասխան եզրակացություններ արվեին: Այսինքն՝ պարզվեց՝ արդյո՞ք նպատակահարմար է առարկայի դասավանդումը. եթե՞ այո, ապա համապատասխան բարեփոխումներ ձեռնարկվեին, իսկ եթե մեծամասնությունը դեմ լիներ, գուցե այդ դեպքում արդարացված լիներ առարկայի համընդունված վերաբերմունքը: Ցավոք, մեր երկրում բավականին երկար ժամանակ է (խոսքը միայն վերջին հնգամյակին չի վերաբերում, մասնավորապես՝ որոշումներ կայացվելիս հաշվի չեն առնվում շահառուների, ներգրավված կողմերի կարծիքները: Լավագույն դեպքում մեկ-երկու քննարկումների արդյունքում որոշումներ են կայացվում, դրվում շրջանառության մեջ, երկար ժամանակ շարունակվում են փորձարկումները կամ աշխատանքները, և միայն հետագայում՝ շատ ուշացած, ի հայտ են գալիս խոչընդոտներ, անհամապատասխանություններ, ոչ ճիշտ արժեքներ ցուցվում: Մի խոսքով՝ արդյունքը գոհացուցիչ լինելուց շատ հեռու, նույնիսկ բավարար չի լինում:

Չգիտեմ՝ այդ որոշումը սովորույթի ուժով մեզ քաղաքականության շարունակություն էր, թե՛ ամբողջապես թիրախավորված կամ նպատակային քաղաքականություն: Ամեն դեպքում իրականությունն այն է, որ առարկայի նկատմամբ մեծ վերաբերմունք դրսևորվեց: Նախ՝ տարածվեցին լուրեր, թե բովանդակային նյութը ներառվելու է «Հայոց պատմություն» առարկայի մեջ, ընդ որում՝ ի սկզբանե մասնագետները դժգոհ էին «Հայոց պատմություն» առարկային հատկացված ժամաքանակից, քանի որ դասընթացի ծավալը բավականին մեծ է: Նախկինում 6–9-րդ դասարաններում «Հայոց պատմություն» առարկային հատկացված էր շաբաթական 1,5 ժամ, այսինքն՝ մի կիսամյակում՝ շաբաթական 1 ժամ, հաջորդ կիսամյակում՝ 2 ժամ, կամ՝ հակառակը: Թեև որոշ դպրոցներ մեծ իրենց պարտադիր ժամաքանակից կես ժամ հատկացնում էին,

և ամբողջ տարին առարկային տրվում էր շաբաթական 2 ժամ, բայց ամեն դեպքում «Հայոց Եկեղեցու պատմությունը» ներառվելուց հետո, բնական է, որ այդ երկու ժամը չէր բավականացնելու: ԿԳՄՍ նախարարությունը, որպես հարցի լուծում, առաջարկում էր «Հայոց Եկեղեցու պատմության» 236 դասաժամի փոխարեն մասնավորապես ընդամենը 64-ը: Սակայն մոտեցումը, բնականաբար, բացարձակապես անընդունելի է թե՛ հոգևոր և թե՛ ազգային շահերի տեսանկյունից:

Հանրակրթական դպրոցում առանձին առարկաներին հատկացված ժամաքանակն առհասարակ չի գոհացնում դասավանդող ուսուցիչներին: Սա խոր ուսումնասիրության հարց է: Այն, որ հատկացված ժամաքանակը բավարար չէ առարկան լիարժեք ուսումնասիրելու համար, ակներև դարձավ մեզ մոտ չափորոշիչների և ծրագրերի ներդրման ընթացքում: Դրա ակնհայտ էությունը վերջերս՝ մասնավորապես 7-րդ դասարանի օրինակով. «Հայոց պատմության» մասնագիտական և ուսուցչական հանրույթի կողմից չընդունված, բազմիցս ներծրված ու չհաջողված այդ դասագրքում ծրագրային և հատկապես «Հայոց Եկեղեցու պատմության» դասամյութերը «դուրս են մնացել» հեղինակի ուշադրությունից: Եվ երբ դրա մասին բարձրաձայնվեց, հեղինակը փորձեց արդարանալ, թե ի՞նչ դասագրքերն այլևս մեզ ծավալի նյութ պարունակելու, այսինքն՝ ծրագրային ամբողջ նյութը շարադրելու խնդիր չունի իր առջև դրված, և երկրորդ՝ նույնիսկ եթե դա իրագործվեր, ապա 176 էջի սահմանում հնարավոր չէր ծրագրային ամբողջ նյութը ներկայացնել: Այնուհայտ է, որ դա արդարացում է ընդամենը: Ստացվում է այնպես, որ միտումնավոր կամ ոչ միտումնավոր (ըստ իս՝ ուղղորդված դիտավորությամբ), բայց, ի վերջո, դասագրքում ներկայացված չեն այն դասամյութերը, որոնք նախկին ծրագրով «Հայոց Եկեղեցու պատմության» դասամյութերն էին, իսկ առարկայական մոտ ծրագրով պետք է ներառված լինեին «Հայոց պատմություն» առարկայի դասագրքի մեջ: Եվ հենց դրանք էին դուրս մնացել:

— Ինչո՞վ է կարևոր «Հայոց Եկեղեցու պատմության» դասավանդումը, ի՞նչ էր տալիս այն մեր աշակերտներին, և, ի վերջո, եթե ՀՀ քաղաքացիների մեծամասնությունը քրիստոնյա է ու Հայ Առաքելական Եկեղեցու հետևորդ, ինչո՞վ չպետք է մեր երեխաները սեփական դավանանքի մասին հավելյալ գիտելիքներ ստանան դպրոցում:

— Դասընթացը, իհարկե, աշխարհիկ դասընթաց է, ամենևին էլ կրոնական դասընթաց չէ: Սովորողները, մեր ունեցած տեղեկություններով, բավականին լավ էին վերաբերվում առարկային, և ուսումնարարության ընթացքում զգալի առաջընթաց էր գրանցվում: Դրա ապացույցներից մեկը «Հայոց Եկեղեցու պատմության» ամենամյա օլիմպիադան էր, որին, պետք է մշտնապես համակրթական մյուս առարկաների համեմատությամբ ոչ պակաս, իսկ երբեմն էլ որոշ առարկաներից նույնիսկ ավելի մեծ մասնակցություն էին դրսևորում սովորողները: Դա

սընթացը սիրված էր, օգտակար, նպաստում էր դպրոցում հայեցի դաստիարակությանն ու ազգային արժեքների ամրապնդմանը, մեծ թիվով ստանդարտի և ընդհանուր բարոյագիտության հիմունքներով քաղաքացու, մարդ անհատի բարոյական կերպարի, ազգային նկարագրի ձևավորմանը, հայ ազգային քրիստոնեական մշակույթը կրողի, պահպանողի ու զարգացնողի դեր ստանձնելուն: Այն աշակերտին տալիս էր ազգային-քրիստոնեական մշակույթն ուսումնասիրելու, արժեքները գնահատելու և համաշխարհային մշակույթում մերն արժևորելու հնարավորություններ: Դասընթացն անհրաժեշտություն էր և չպետք է մնա վերաբերմունքի արժանանար:

— Արդյո՞ք «Հայոց Եկեղեցու պատմության» դասավանդումն ինչ-որ «վտանգ» էր ներկայացնում ազգային ու կրոնական փոքրամասնությունների համար կամ խաթարում էր ժողովրդավարությունը:

— Չեմ կարծում, որովհետև սկզբնական շրջանում որոշ դեպքեր եղան՝ ոչ այնքան կրոնական կամ դավանական հիմքով, որքան ազգային պատկանելությամբ: Հատկապես Հայաստանում որոշ ազգային փոքրամասնությունների ներկայացուցիչների կողմից՝ եզրին, քրդեր և այլն, եղան որոշակի մտավախություններ, սակայն դրանք հաղթահարվեցին, որովհետև ծնողներն էլ հասկացան, որ առարկան ամենևին էլ քարոզչության նպատակ չի հետապնդում, նպատակ չունի ստվարացնելու Հայ Առաքելական Եկեղեցու հետևորդների թիվը: Դա ընդամենը ՀՀ քաղաքացիների բացարձակ մեծամասնության՝ Հայ Առաքելական Եկեղեցու հետևորդ լինելու հանգամանքով էր պայմանավորված և անհրաժեշտություն էր: Մի խոսքով՝ ազգային փոքրամասնությունների ներկայացուցիչների համար պարզ դարձավ, որ դասընթացը վտանգ կամ սպառնալիք չի պարունակում, մասնավորապես՝ որ առարկայի ուսումնասիրության շրջանակներում ծանոթանում էին մեծ համաշխարհային կրոններին և քիչ ավելի մանրամասն՝ քրիստոնեությանն ու Հայոց Եկեղեցու պատմությանը, հայ ժողովրդի պատմական ճակատագրում Հայոց Եկեղեցու ունեցած դերին ու նշանակությանը, համազգային նշանակության տարբեր իրադարձություններին մասնակցությամբ, ազգային մշակույթի վրա Հայոց Եկեղեցու ազդեցությամբ:

Առարկան ավելի շատ քաղաքակրթական, մշակութային դասընթաց էր, այն քրիստոնեական ազգային մշակույթի ակունքներին, զարգացման ընթացքին ու ձեռքբերումներին ծանոթացնելու և այդ մշակույթի հոգեբանությամբ դաստիարակելու նպատակ էր հետապնդում և ամենևին էլ չունեցրեք ազգային օրենքի նպատակ:

— Որոշումն այն է, որ «Հայոց Եկեղեցու պատմությունը» ներգրավվի, տարրալուծվի «Հայոց պատմության» մեջ: Մենք ակադեմիկոսներ, որ մեր չափորոշիչներին համաձայն պատրաստված 7-րդ դասարանի «Հայոց պատմության» դասագրքը լեցուն է բազմաթիվ սխալներով: Այս դեպքում ևս ԿԳՄՍ նախարարությունը չնախանջեց, և նախարարը հայտարարեց, որ դասագրքը կմնա շրջանառության մեջ: Այդ



որոշումը ինչպե՞ս կբացատրեք: Արդյո՞ք քաղաքական միտում կա այս ամենում:

— Բնականաբար, սկզբից արդեն բացահայտվել էր այդ միտումների մեծ մասը, մասնավորապես մրցույթի ներկայացված երեք դասագրքերից ի վերջո հաղթող դուրս եկավ հենց այդ տխրահռչակ դասագիրքը: Արդեն իսկ առաջին փուլում մրցույթի ներկայացված դասագրքերից մեկը ցածր միավորներ ստացավ և առաջին փուլից դուրս մնաց, որովհետև հիմնական մասով չէր համապատասխանում մեր չափորոշիչներին ու ներկայացված ծրագրային պահանջներին: Հաջորդիվ մնացին երկուսը, ընդ որում՝ մինչև սեպտեմբեր էլեկտրոնային տարբերակով երկուսն էլ մնացել էին Դասագրքերի շրջանառում հիմնադրամի կայքէջում: Հետո պարզվեց, որ բողոքների արդյունքում դասագրքերի «կրկնակի փորձաքննություն է իրականացվել», ինչի արդյունքում երկրորդ մրցույթային դասագիրքը՝ Աշոտ և Արսեն Դուկասյանների հեղինակությամբ, որը նախորդ փուլում ավելի բարձր միավորներ էր հավաքել, քան երաշխավորված և ներկայումս գործածության մեջ գտնվող մյուս դասագիրքը, ստացավ ավելի պակաս միավորներ, նույնիսկ գիտականությանը չհամապատասխանելու «մեղադրանքով» դուրս բերվեց շրջանառությունից: Հեղինակներին տրված՝ նախարարության պատասխանում գիտականությանը չհամապատասխանելու վերաբերյալ մեկ-երկու, ոչ այնքան հիմնավորված դիտարկումներ էին ներկայացված, այնինչ գործող դասագրքում մեծ թիվ են կազմում մասնագիտական լուրջ սխալներն ու վրիպումները, դիպակոխականությունները, որոնք քարտեզը կարգալու բանալին են, և քարտեզի հետ աշխատանքը ուսուցիչը կազմակերպում է հենց այդ օժանդակող, պայմանական մշանների օգնությամբ: Այսինքն՝ գործածության մեջ մնացած դասագիրքը, գիտական առումով, զգալիորեն ավելի ցածր մակարդակ ունի, քան գործածությունից դուրս բերված դասագիրքը, հետևաբար ակնհայտ է, որ ԿԳՄՍ նախարարությունը նպատակաուղղված քաղաքականություն էր տանում, որ միակ հաղթողը մնար այդ դասագիրքը, և այդպես էլ եղավ: Ակա-

դեմիական, մասնագիտական, ուսուցչական հանրության բարձրաձայնած սխալները, անհամաձայնությունները, մասնավորապես մրցույթի ներկայացված երեք դասագրքերից, այդ թվում՝ առաջադրանքներին, դասամյութի բովանդակությամբ, նյութի շարադրանքի թերություններին վերաբերող, անտեսվեցին:

7-րդ դասարանի «Հայոց պատմության» դասագիրքը որակապես զգալիորեն զիջում է «Հայոց պատմության» նախորդ դասագրքերին և մրցույթի ներկայացված մյուս դասագրքին, բայց ԿԳՄՍ նախարարության կանխակալ ու աշառու գործունեության շնորհիվ ճանաչվեց հաղթող ու մնաց գործածության մեջ: Թեև մասնագետներն ու ուսուցիչները հետագայում շարունակեցին իրենց բողոքներն արտահայտել, սակայն ԿԳՄՍ նախարարությունն անդդվելի մնաց, չանցած մասնագետների և դասավանդող ուսուցիչների հիմնավորված բողոքներին ու փաստարկումներին, հնարավորինս ձգձգեց դասագրքի խոտանման գործընթացը և այդպես էլ այդ ձախողված ու մերժված դասագիրքը թողեց գործածության մեջ:

Ի վերջո հեղինակը երկու անգամ պատրաստեց ներկայացված դիտարկությունների և առաջարկությունների վերաբերյալ իր պատասխանը, թե դրանցից որը որքանով է ընդունելի, որքանով է ինքը համամիտ դրանք: Հեղինակի այդ պատասխանները, ընդհանուր առմամբ, ընդամենը տասը էջով էին պակաս դասագրքի ծավալից: Ստացվում է այնպես, որ ուսուցիչը յուրաքանչյուր դասից առաջ պետք է աշակերտների հետ դասագրքի սխալների ուղղում կատարեր, այնուհետև անցներ իր բուն գործին: Բնականաբար, առանց այդ էլ ժամաքանակի սղության և ծրագրային նյութը տրված ժամանակահատվածում յուրացնելու առումով խնդիրներ կային, և ուսուցիչները չէին հասցնում իրականացնել այդ ամենը մեկ դասի ընթացքում: Այսինքն՝ դա մոտ, լրացուցիչ ծանրաբեռնվածություն, աշխատանք էր ուսուցչի համար: Բայց, ինչպես ասացինք, այս ամենը բարձրաձայնելուց ոչինչ չփոխվեց, նախարարությունը գնաց այն ճանապարհով, որ ձգձգեց գործընթացն ու, այո, հասավ նրան, որ ուսումնական տարին ավարտվեց, և դասագիրքն այդպես էլ դուրս չբերվեց գործածությունից: Բայց ի սկզբանե հենց այն պահանջն էր դրված, որ անորակ դասագիրքը դուրս բերվի շրջանառությունից, մինչև որ դասագիրքը կհամապատասխանեցվի գործող չափորոշիչային ու ծրագրային պահանջներին և գերի կլինի մասնագիտական այդքան մեծաքանակ լուրջ սխալներից, էլ չասեն կետադրական, ուղղադրական սխալների ու վրիպակների մասին: Ցավալիորեն, հեղինակը ներկայացված դիտարկումների մեծ մասը որակել է «վրիպակ»: Վրիպակ կարելի է համարել, երբ այս կամ այն տառի փոխարեն բոլորովին ուրիշ տառ է տպագրված լինում, կամ բառի վերջին տառը կամ ստորակետն է դուրս մնացած լինում, բայց ոչ այն, որ, օրինակ, 370-ի փոխարեն 70 է տպագրված, կամ որ մշված չէ՝ իրադարձությունը Քրիստոսի ծննդից առաջ է տեղի ունեցել, թե՛ հետո: ➤ էջ 5, 6

Հայաստանում գործող հիմնական աղանդները և դրանց վտանգավորությունը

Եթե միջնադարյան աղանդավորական շարժումները հիմնականում սոցիալական բնույթ ունեին և տեղի սոցիալ-քաղաքական իրավիճակի ծնունդ էին, այսօր վիճակը բոլորովին այլ է. օտարամուտ, օտարածին աղանդները պառակտում են մեր հասարակությունը և խարխուլում մեր պետականության հիմքերը:

Միջնադարյան և այսօրվա աղանդների միջև կան մի շարք նմանություններ, բայց և առկա են բազմաթիվ տարբերություններ: Հայաստանում ներկայումս գործում են բազմաթիվ աղանդներ, որոնցից են Եհովայի վկաները, հոգեգալստականները, մորմոնները, մուսուլմանները և այլն: Այս բոլոր աղանդները Հայաստան հասնելուց առաջ որոշակի ճանապարհ են անցել: Ժամանակակից աղանդավորական շարժումներն սկիզբ են առել 1830-ական թթ. ամերիկյան մայրցամաքում: Դրանցից ենթևե գոյություն ունեցածներից հարկ է առանձնացնել ամերիկյան աղանդավորական շարժումների առաջամարտիկը դարձած *մորմոններին*: Մորմոններից հետո ասպարեզ իջած բազմաթիվ այլ աղանդներ ոգեշնչված էին և որոշակի նմանություններ ունեին նրանց հետ:

Մորմոնների աստվածաբանությունը խճճված մի հանգույց է, որը պարզորեն պատկերացնելը և այն հավատացյալներին մատչելի ներկայացնելը գրեթե անհնար է:

Պատճառն այն է, որ մորմոն աստվածաբանության մեջ կան բազմաթիվ հակասություններ, վրիպակներ, իրարամերձ դրույթներ, որոնք նրանց առաջնորդները դժվարությամբ են քողարկում և հաճախակի ստիպված են լինում նոր գաղափարներ առաջ բերել կամ փոխել իրենց տեսակետները այս կամ այն հարցի շուրջ՝ ավելի համոզիչ թվալու և իրենց անսխալականությունն ապացուցելու համար:

Ընդհանրապես աղանդներին հատուկ է փոփոխվելն ըստ բնականվայրի և ազգային մտածելակերպի՝ հարմարվելով տվյալ հասարակությանը: Օրինակ՝ իրենց գործունեության սկզբնական շրջանում մորմոններն ընդունում էին բազմակնությունը, իսկ արդեն շուրջ 117 տարի է՝ սկսած 1890 թվականից, այս երևույթն անընդունելի են համարում ամերիկյան մայրցամաքում: Պատճառը բավականին պարզ է. այստեղ օրենքով արգելված է բազմակնությունը: Մինչդեռ նրանք միանգամայն հանդուրժող են և ընդունելի են համարում նույն երևույթը մահմեդական երկրներում, որտեղ բազմակնությունը թույլատրված է տվյալ երկրների օրենքներով:

Մորմոն դավանաբանության էկլեկտիկորեն ընդօրինակելը և այն նույնությամբ այլ տեղերում և պայմաններում հարմարեցնելը:

Մորմոն դավանաբանության հիմնադիր ժոզեֆ Սմիթի համար

ոգեշնչման աղբյուր է եղել Ս. Գիրքը, որը պատմականորեն կապված է Հին աշխարհի ժողովուրդների, երկրների, աշխարհագրության և հավատալիքների հետ: Սակայն այստեղ ոչ մի հիշատակում չկա Նոր աշխարհի՝ Ամերիկա մայրցամաքի մասին: Հենց դա էլ շատ հմտորեն օգտագործեց Սմիթը՝ նոր դավանանք ստեղծելու հետ կապված իր փայլուն գաղափարը կյանքի կոչելու համար: Դրա համար նախ և առաջ Ամերիկյան ևս պետք է ունենար նախապատմություն, որն էլ Սմիթը հնարեց:

Պետք էր ունենալ նաև սեփական Սուրբ Գիրք, երուսաղեմ, Սիոն և այն ամենը, ինչ շարադրված էր Սուրբ Գրքում: Իսկ Սուրբ Գիրքն էլ փոխարինվեց Մորմոնի գրքով, որտեղ շարադրվեց Նոր աշխարհի նախապատմությունը՝ հին ժամանակներից սկսած: Հետագայում նույն սկզբունքով վերաբնակեցվեց Տեգրեքը, և ողջ տիրեզրեքի համար Սմիթն ուներ փրկիչներ: Ըստ մորմոն վախճանաբանության՝ ամեն մի փրկված մորմոն դառնում է մի նոր աստված ու տեղափոխվում անձայրածիր Տեգրեքի՝ նախօրոք որոշված որևէ մոլորակ: Այստեղ էլ փրկիչ մորմոնը հիմք է դնում նոր քաղաքակրթության՝ դառնալով այդ աշխարհի համար Ադամ: Եվ այս վերաբնակեցումը շարունակվում է անվերջ:

Սմիթն իր աստվածաբանությունը շարադրել է ըստ իր «տեսիլք-

ների»։ Առաջին տեսիլքն իբրև թե Սմիթն ունեցել է դեռ 15 տարեկանում, երբ անտառում աղոթելու ժամանակ նրան տեսվանում են Հայր Աստված ու Հիսուս Քրիստոս՝ հայտնվելով, որ այս աշխարհում գոյություն ունեցող և ոչ մի եկեղեցի ճշմարիտ չէ և հաճելի չէ իրենց, և միայն նա՝ Սմիթը, կարող է վերահաստատել ճշմարտությունը: Եվ Սմիթն է լինելու նոր մարգարեն այդ նորագույն վերջին օրերի հայտնությունների:

Սմիթի երկրորդ տեսիլքը համեմատելով Մովսեսի կամչի դրվագի հետ՝ ակնհայտ է դառնում դրանց նմանությունը. Մովսեսի ամձն ուղղակի փոխարինված է Սմիթի անձով. «Եվ այսպես, վերը նշված թվականի սեպտեմբերի 21-ի երեկոյան քնելու պատրաստվելով՝ ես, երեկոյան աղոթք ասելով Ամենակարող Աստծուն, Նրան խնդրեցի ներել իմ մեղքերն ու զանցանքները ու նաև իր ցուցումներն ուղարկել, որպեսզի ես կարողանամ իմանալ իմ դիրքը և վիճակը Նրա առաջ: Ես վստահ էի, որ կստանամ այդ ցուցումները ճիշտ այն ձևով, ինչ ձևով նախկինում արդեն ստացել էի: Մինչ ես աղոթքով դիմում էի Աստծուն, նկատեցի, որ աստիճանաբար պայծառացող ինչ-որ լույս հայտնվեց սենյակում: Քիչ անց սենյակս այնքան լուսավոր էր, որ կարծես կեսօր լիներ: Անկողնուս առջև հանկարծ մի անձնավորություն հայտնվեց: Թվում էր, թե նա

կանգնած է օդում, քանի որ ոտքերը չէին դիպչում գետնին»:

Այս տեսիլքն աստիճանաբար իմաստնություն է տալիս Սմիթին, նրան պատրաստում այն առաքելությանը, որի համար ինքը՝ Սմիթը, իբրև թե նախօրոք ընտրված էր:

Բոլոր աղանդավորներն այս կամ այն ձևով կապված են որոշ անհատների հետ, որոնք համարվում են հեղինակություններ (օրինակ՝ Ռասելը՝ Եհովայի վկաների համար, Սմիթը՝ մորմոնների համար և այլն):

Ինչպես Սմիթը, այնպես էլ մյուս աղանդապետներն իրենց անձի շուրջ ստեղծում են խորհրդավոր-գերբնական պաշտամունք և իրենց համայնքների հավատացյալներին համոզում, որ կարող են վերծանել, մեկնաբանել իրենց իսկ մասնավոր տեսիլքները և Աստծո խոսքը: Նրանց հանկարծակի «այցելում են» Հովհաննես Մկրտիչը, Քրիստոսի առաքյալները, նրանց ձեռքով իրենք մկրտություն են ստանում և այլն: Հաշվի առնելով այն հանգամանքը, որ աղանդավորական շարժումներին հարողները հիմնականում հասարակության անկիրթ, սոցիալական, հոգեբանական և ֆիզիկական ծանր դրության մեջ գտնվող կամ ցածր ինքնագնահատական ունեցող խավն են, աղանդավոր առաջնորդների համար առանձնակի դժվարություն չի կազմում հավատացյալներին իրենց ընտրյալ լինելն ապացուցելու համար: ➔ էջ 8

Պայքար ընդդեմ Հայոց Եկեղեցու պատմության խնացության

← էջ 4

Ներկայացնեմ դասագրքում տեղ գտած մասնագիտական սխալների, անճշտությունների մի շարք՝ համոզվելու՝ արդյո՞ք դրանք «վրիպակներ» են: Այսպես, օրինակ. «Այդ ընթացքում սկսվեց Վանի թագավորության ընդարձակման շրջանը: Այն արդեն պատրաստ էր վճռական ճակատամարտի մեջ մտնելու Ասորեստանի հետ՝ Արևելյան Ասիայում առաջնորդության, ինչպես նաև Միջերկրական ծովի արևելյան կողմով անցնող հիմնական առևտրային ուղիներում գերիշխանության համար» (էջ 39): «Տևական մի շրջան Վանի թագավորության գերիշխանությունն Արևելյան Ասիայում հակազդեցության չէր հանդիպում» (էջ 40): Երբ ԵՊՀ-ում հեղինակի հետ կայացած հանդիպման ժամանակ ես Ս. Հովհաննիսյանին հարցրի, թե ի՞նչ է Արևելյան Ասիան, ի՞նչ երկրներ է ընդգրկում, նա ընդամենը պատասխանեց՝ նոր տերմին է, առանց մանրամասնելու, թե որ երկրներին է վերաբերում այդ նոր տերմինը: Մինչդեռ «Արևելյան Ասիան» այնքան էլ նոր եզրույթ չէ. ըստ Հայկական սովետական հանրագիտարանի՝ այն «....ընդգրկում է ԽՍՀՄ և ԶԺՀ արևելյան մասը, ԿԺՀ, Հարավային Կորեան և Ճապոնիան» (ՀՍՀ, հտ. 2, Երևան, 1976, էջ 32): Այսպիսով, ըստ Ս. Հովհաննիսյանի, Վանի թագավորությունը տևական մի ժամանակաշրջանում եղել է Արևելյան Ասիայում գերիշխող տերություն: Հավանաբար հենց այս ժամանակներից են Հին Զինաստանում թագավորներին «վան» անվանումը տվել:

Եվս մի քանիսը. «Երկաթի օգտագործումը հանգեցրեց երկաթե գութանների կիրառմանը, ինչը հնարավորություն տվեց հերկել


բազմաթիվ չօգտագործված հողատարածքներ» (էջ 48, Վանի թագավորության տնտեսությունը): «Ռոմեոյի տարածքների վարն ու հերկը կատարվել են երկաթե խոփ ունեցող արորներով» (էջ 68, Երվանդական Հայաստանի տնտեսությունը): «Հեղաշրջիչ նշանակություն ունեցավ արորին փոխարինած գութանը, որի ամուր երկաթյա խոփը թույլ էր տալիս հեշտությամբ մշակել նախկինում չմշակվող խոպան հողերը» (171–172, Բագրատունյաց Հայաստանի տնտեսությունը և քաղաքները): Հարց է առաջանում՝ ինչպես եղավ, որ Վանի թագավորությունում երկաթե գութաններ էին կիրառում, Երվանդական Հայաստանում «վարն ու հերկը» կատարվում էին երկաթե խոփ ունեցող արորներով, բայց Բագրատունյաց Հայաստանում հեղաշրջիչ նշանակություն ունեցավ արորին փոխարինած գութանը: «Ռոմեոյի տարածքների վարն ու հերկը կատարվել են երկաթե խոփ ունեցող արորներով» (էջ 68): Ցանկալի է, որ Ս. Հովհաննիսյանը բացատրի նաև, թե տարբերություն կա՞ վարի ու հերկի միջև:

«Վերջինս (Սամուր կամ Շամը — Ս. Ս.) նաև իր ամուսնով դրամներ էր հատում, որոնք մինչ օրս հայտնի ամենափոքր հայկական մետաղադրամներն են» (էջ 61): Սամուսի հատած դրամները մեզ հասած առաջին հայկական արքայական դրամներն են, իսկ մեզ հայտնի ամենափոքր հայկական մետաղադրամները հատել են Երվանդ II ստորապը և Տիրիքազը (տես Հայ ժողովրդի պատմություն, ՀՍՄՀ ԳԱ հրատ., Երևան, 1971, էջ 690):

«Բ. ա. 83 թ. գրավեցին Սելևկյանների մայրաքաղաք Անտիոքը, որը դարձավ Տիգրան Մեծի գլխավոր վարչական կենտրոնը Լևանտում» (էջ 81): Նախ՝ ոչ տեղին ու

ժամանակավրեպ է այս շրջանի մասին խոսելիս «Լևանտ» եզրույթի կիրառումը, քանզի այն ֆրանսիական կամ իտալական անվանում է, հետևաբար շատ ավելի ուշ ժամանակների է վերաբերում, ապա՝ դասագրքում հեղինակը չի տալիս այս եզրույթի բացատրությունը:

«Հայտնի են Մովսես Խորենացու և Ամանիա Շիրակացու հեղինակած «Աշխարհացոյց»-ները, որոնք եզակի աշխատություններ են» (էջ 154): «Նկատենք, որ Ամանիա Շիրակացու «Աշխարհացոյցը», հիմնված լինելով Մովսես Խորենացու «Աշխարհացոյցի» վրա, նաև ճշգրտել ու լրացրել է այն» (էջ 154): Փաստորեն, ըստ Ս. Հովհաննիսյանի, կա և՛ Խորենացու Աշխարհացոյց, և՛ Շիրակացու Աշխարհացոյց: Դասագրքում նման միտք գրելուց առաջ, թերևս, պետք էր ուշադիր կարդալ ակամավոր պատմաբան Բաբկեն Հարությունյանի ուսումնասիրությունը, որտեղ հեղինակը համոզիչ և սպառիչ կերպով ապացուցել է, որ. ««Աշխարհացոյց»-ի քննությունը ցույց է տալիս, որ այն իրոք ստեղծվել է 5-րդ դարում, և նրա հեղինակը պատմահայր Մովսես Խորենացին է: Հայ աշխարհահռչակ գիտնական Ամանիա Շիրակացին «Աշխարհացոյց»-ի հեղինակը չէ և չէր էլ կարող լինել: Ըստ արժանվույն գնահատելով նրա վիթխարի վաստակը Հայաստանում բնական գիտությունների զարգացման ասպարեզում՝ պետք է նշել, որ ոչ մի փաստ, եթե չհաշվենք «Աշխարհացոյց»-ում տեղ գտած մի շարք ընդմիջարկություններ, չի խոսում նրա հեղինակության օգտին: «Աշխարհացոյց»-ի ձեռագրերում որպես կանոն հեղինակ է հիշվում Պատ-



մահայրը, սակայն չկա ոչ մի ձեռագիր, որ հաստատեր Ամանիա Շիրակացու հեղինակ լինելը: Հարցին «Աշխարհացոյց»-ը որոշ խմբագրման է ենթարկվել Ամանիա Շիրակացու կողմից, թե ոչ, հնարավոր չէ դրական կամ ժխտական պատասխան տալ մյուսի բացակայության պատճառով» (տես Բ. Հարությունյան, «Աշխարհացոյցը» և չորս շաբթերի խնդիրը», Երևան, 1997, էջ 102–103):

Եվս մեկի մասին նշեմ, և անցնեմք առաջ. «Իր վեհությամբ հատկապես աչքի է ընկել մայրաքաղաք Անիի Մայր տաճարը, որը կառուցել է Մանուելի աշակերտ Տրդատ ճարտարապետը» (էջ 175): Նշենք, որ մասնագիտական որևէ մեծագրության կամ սկզբնաղբյուրի մեջ մեզ չհաջողվեց որևէ վկայություն կամ ակնարկ գտնել այն մասին, որ Տրդատ ճարտարապետն աշակերտել է Մանուել ճարտարապետին: Հայտնի է, որ Մանուել ճարտարապետը ստեղծագործել է 10-րդ դ. առաջին կեսին, իսկ ըստ Կ. Հով-

հաննիսյանի՝ Տրդատը ծնվել է մոտավորապես 940-ական թթ. (տես Կ. Ս. Օգանեսյան, Зодчий Трдат, Ереван, 1951, էջ 38): Նույնիսկ եթե ընդունենք, որ մանկահասակ Տրդատը կարող է հանդիպած լինել Մանուել ճարտարապետին, այնուամենայնիվ Մանուելին աշակերտելու պնդումը խիստ թեական է ու ապացուցման կարոտ:

Այսքանով, սակայն, չեն սպառնում խոսելի ու խոսանելի դասագրքում եղած մասնագիտական սխալները, «վրիպումներն» ու անճշտությունները: Դա մոտավորապես երեխային խաբելու նման մի բան է: Այսինքն՝ ոչ մի լուրջ մասնագետ կամ ուսուցիչ չի համաձայնի դրան, որովհետև ակնհայտ սխալը, թյուր եզրակացությունն ու մեկնաբանությունը փորձ է արվում ներկայացնելու ընդամենը որպես «վրիպում»:

— Երբ նայում ենք այս ամբողջ ընթացքին՝ պատմության դասագրքի խեղաթյուրումը, «Հայոց եկեղեցու պատմություն» առարկան ուսումնական ծրագրից դուրս թողնելը, եկեղեցու դեմ արշավը, տպավորությունն այնպիսին է, որ պայքար է մղվում ազգային դեմ, կամ մենք ինքնական հրաժարվում ենք մեր ազգային ինքնությունից, այն ամենից, ինչը մերն է: Դեպի դուր ենք գնում, կամ դեպի դուր ենք մեզ տանում:

— Ցավոք, այո, Հայոց եկեղեցու նկատմամբ արշավ կա, որը բազմաթիվ մասնագետներ զուգահեռեցին խորհրդային իշխանության տարիներին Հայոց եկեղեցու դեմ տարվող քաղաքականությանը («կարմիր անաստվածները», մարտնչող տգիտությունը), երբ հարյուրներով ու հազարներով փակվեցին եկեղեցիներ Հայաստանում և ամբողջ Խորհրդային Միության տարածքում: ➔ էջ 6

Պայքար ընդդեմ Հայոց Եկեղեցու պատմության իմացության

← էջ 4, 5

Հայոց Եկեղեցուն նույնիսկ արգելեցին նշել Հայոց ցեղասպանության զոհերի հիշատակի օրը (վախենամ՝ նորից կրկնվի): Բազմաթիվ հոգևորականներ ձեռքադրեցին, արգելեցին կամ մահապատժի արժանացան: Կարծես սա նմանվում է 1920–1930-ական թվականներին «Կարմիր մարտնչող անաստվածների»՝ հայ ազգային հիմնական կառույցներից մեկի՝ թերևս գլխավոր ազգային կառույցի՝ Հայ Առաքելական Եկեղեցու դեմ, ինչը ծանր հետևանքներ ունեցավ այն ժամանակ, և իրավիճակը փոխվեց երկրորդ աշխարհամարտից հետո միայն, որովհետև խորհրդային իշխանությունները տեսան, որ Հայոց Եկեղեցու նկատմամբ իրենց վարած չարաղետ քաղաքականությամբ հանդերձ՝ Հայոց Եկեղեցին երբեք փորձ չարեց համագործակցել նացիստական Գերմանիայի կամ խորհրդային Միության թշնամիների հետ: Պատերազմի տարիներին Հայոց Եկեղեցին կազմակերպեց հանգանակություն, ստեղծեց «Սասունցի Դավիթ» տանկային շարասյունը և ուղարկեց գործող բանակ: Երկրորդ շարասյուն կազմավորման աշխատանքներն էլ ընթացան, բայց պատերազմն ավարտվեց, ու գործն անավարտ մնաց:

Ավանավոր հայ պատմաբան Նիկողայոս Ադոնցի խոսքերով՝ հայրենիքի գույնը բոլորովին նշանակությունի չունի. մենք հայրենիքը սիրում ենք ոչ թե նրա գույնի համար, այլ հայրենիք լինելու համար: Կարևոր չէ, թե հայրենիքում ով է իշխանության գլուխ՝ բոլշևիկները, դաշնակցականները, անկուսակցականները կամ որևէ այլ ուժ: Ամեն դեպքում հայրենիքը բարձրագույն արժեք է, սրբություն, և յուրաքանչյուր հայ պետք է իր գործունեությամբ, ամբողջ աշխատանքով նպաստի հայրենիքի շենացմանը, զորեղացմանն ու ամրապնդմանը:

Կարծում եմ՝ պղտորված ջրերը կմաքրվեն, կպարզվի ամեն ինչ: Եկեղեցին դարեր շարունակ այնքան մղձավանջներ, պատուհասներ, դժոխակ ու սև օրեր է տեսել, թող սա վերջինը լինի: Միննույն է՝

վաղ թե ուշ հայ հասարակությունը գիտակցելու է Հայոց Եկեղեցու նշանակությունը, արժևորելու է նրա դերը մեր պատմական ճակատագրում, մեր մշակութային ժառանգության ձևավորման, զարգացման և փոխանցման գործում, ինչպես նաև հայրենիքից դուրս ապրող հայության համախմբման, հայեցի դաստիարակության, ազգային նկարագրի ու հոգեկերտվածքի պահպանման գործում: Եկեղեցու դեմ այս օրերի պայքարը նմանեցնում եմ հողմաղացների դեմ պատերազմին...

— **Չմոռանանք՝ այդ արշավն սկսել են շատ ավելի վաղ՝ 2018-ից, և դա պայմանավորված չի եղել այս օրերին ընթացող «Տավուշը հանուն հայրենիքի» շարժմամբ:**

— Այո, հավատ չի ներշնչում այն պնդումը, որ այս ամենն սկսվել է Հայոց Եկեղեցու գործունեության կամ դիրքորոշման պատճառով: Հայաստանի նոր իշխանությունների վերաբերմունքը կրոնական մյուս կազմակերպությունների, այդ թվում՝ աղանդավորական կազմակերպությունների հանդեպ բացահայտորեն տարբերվում է:

Եվ հիմա, չգիտես ինչու, հիշել են, որ աղանդավորությունը Հայաստանում լայն տարածված է, իսկ Հայոց Եկեղեցին, փոխանակ «քաղաքականությամբ» զբաղվելու, ավելի լավ կլինեք աղանդավորության դեմ պայքար ծավալել: Այսինքն՝ իրենց հանցավոր անգործությունը կամ իրենց իրագործած մեղքերը փորձում են բարդել ուրիշի վրա, քավության մոխրագներ գտնել կամ ցանկալի ներկայացնել իրականության տեղ: Աղանդավորության դեմ պայքարում պետական մակարդակով հնարավոր էր ոչ միջնորդավորված դրսևորում լինել, այսինքն՝ պետությունը հովանավորել Հայոց Եկեղեցուն՝ աղանդավորական ազգապառակտիչ գործունեության դեմ տարվող պայքարում: Եվ միասնաբար հանդես գալիս ազգային-պետական արժեհամակարգն ու մշակույթը ժխտող քաղաքականության դեմ, որը խարխուլում է հայոց ազգի, ընտանիքի և, ի վերջո, պետության հիմքերը: Ակնհայտ է նաև, որ հիշյալ կրթական բարեփոխումների

շրջանակներում թիրախավորվել ու հարվածի տակ են դրվել հայագիտական առարկաները, կտրուկ նվազել են սերունդներին ռազմա-հայրենասիրական ոգով դաստիարակելու պահանջներն ու հնարավորությունները: Ավելորդ ենք համարում բացատրել, թե որքան անհրաժեշտ է ազգանպաստ, հայեցի ու ռազմահայրենասիրական կրթությունը մեր պետությանն ու ժողովրդին, որը գտնվում է գոյաբանական վտանգների, լուրջ մարտահրավերների և պատերազմի մշտական սպառնալիքի առջև:

— **Վերադառնալով դասագրքին՝ ինչ իրավական հիմք է հարկավոր, և ինչ բարեփոխումներ են անհրաժեշտ, որ «Հայոց Եկեղեցու պատմությունը» վերադարձվի ուսումնական առարկայացման:**

— Դա ԿԳՄՍ նախարարության և Հայոց Եկեղեցու՝ սեղանի շուրջ նստելով, իրար հասկանալով կարող է վերականգնվել, ինչը շատ ցանկալի է:

— **Դա հնարավոր է ք համարում:**

— Իհարկե, հնարավորություն տեսնում եմ: Որոշ դպրոցներում ինքնուրույնաբար կարող են առարկա կամ դրսևորման ուսումնասիրել, սակայն հասկանալի է, որ դասընթացը համակարգված, ըստ տարիների դասավանդման անհրաժեշտության գիտակցումով պետք է ներդրվի: Ժամաքանակի խնդիր հանրակրթական գրեթե բոլոր առարկաներում ունեն, և դժվար է պատկերացնել մի դպրոց, որը կկարողնա դասաժամ հատկացնել ու ապահովել «Հայոց Եկեղեցու պատմության» կամընտրական դասավանդումը 6–11-րդ դասարաններում:

Ուսումնասիրությունների, քննարկումների, մասնագիտական լուրջ վերլուծությունների արդյունքում ՀՀ-ի առարկան պետք է վերադարձնել հանրակրթական դպրոց՝ որպես հանրակրթական պարտադիր առարկա: Դա շատ նպաստավոր կլինի, և օգտակարությունը կարճ ժամանակում կզգանք, ինչպես եղավ տարիներ առաջ:

Առարկայի վերադարձի անհրաժեշտությունը կա, դրանում համոզվելու համար պետք է լուրջ



ուսումնասիրություն կատարվի՝ դպրոցում սովորողների, դասավանդողների, ծնողների, հայ հանրության վերաբերմունքը վերհանելու համար, և միայն հետազոտությունների արդյունքների հիման վրա պետք է որոշում կայացվի:

— **Ավելացնելու բան ունե՞ք:**

— Հիշեցնեմ, թե ինչպես է տեղի ունեցել ՀՀ-ի առարկայի մուտքը հանրակրթական դպրոց. 2002 թ. Մայր Աթոռ Սուրբ Էջմիածնի և ՀՀ կառավարության միջև կնքվել է համաձայնագիր՝ ՀՀ հանրակրթական դպրոցներում «Հայոց Եկեղեցու պատմություն» առարկան ներդնելու վերաբերյալ: Համաձայնագիրը ստորագրել են Ն.Ս.Օ.Տ.Տ. Գարեգին Երկրորդ Ամենայն Հայոց Կաթողիկոսը և ՀՀ վարչապետ Անդրանիկ Մարգարյանը: Այն ամրապնդվել է 2005 թ.՝ Վեհափառ Հայրապետի և ՀՀ ԿԳ նախարար Սերգո Երիցյանի միջև կնքված համաձայնագրով՝ կարգավորելով յուրաքանչյուր կողմին վերապահված աշխատանքներն առարկայի առնչությամբ: «Հայոց Եկեղեցու պատմություն» 2005 թվականից ընդգրկվել է հանրակրթական դպրոցների պետական ուսումնական ծրագրի 4–10-րդ (հետագայում՝ 5–11-րդ) դասարանների առարկայացմանում: Մինչև առարկայի՝ դպրոց վերադարձնելը, իմ կարծիքով, պետք է զգալիորեն զորեղացնել,

ընդլայնել և աշխուժացնել Մայր Աթոռ Սուրբ Էջմիածնի քրիստոնեական դաստիարակության կենտրոնի գործունեությունը (ընդլայնել շաբաթօրյա կամ կիրակնօրյա դպրոցների ցանցը, հաճախակի կազմակերպել Հայոց Եկեղեցու պատմություն և կրոնական գիտելիքներ դասավանդող ուսուցիչների վերապատրաստման դասընթացներ, մշակել և տպագրել համապատասխան դասագրքեր ու ձեռնարկներ, զարկ տալ հոգևորականության հետ կրոնական թեմաներով քննարկումներին, հոգևոր գրականություն, եկեղեցական տոների, ծեսերի, խորհուրդների, բարեպաշտական սովորույթների մասին գրքույկներ հրատարակել ու բաշխել, սովորողների համար կազմակերպել ճամբարներ, ամառային դպրոցներ և այլն):

Ինձ թվում է՝ երբ ճգնաժամային պահերը հաղթահարելուց հետո վերաբերմունքը փոխվի, կգիտակցեն, որ դա անմտություն էր, և պետք չէր աշխարհաբաղաքական բարդ իրավիճակում երկրի ներսում մեծացնել կամ խորացնել բևեռացումը կամ մոլոր պառակտումների տեղիք տալ: Մեր ինքնիշխանությունը սասանելու, պետության հիմքերը թուլացնելու, ավելի խոցելի դարձնելու փոխարեն մեր հասարակությունն այս պահին միաբանվելու, մեր առջև ծառացած մարտահրավերներին, սպառնալիքներին դիմագրավելու առաջնահերթ խնդիր ունի: Նման քայլերը նաև առիթ են դառնում մեր երկրի վրա դրսից ավելի ակտիվ ներգործելու համար, հանգեցնում ոչ ցանկալի և ոչ ազգանպաստ որոշումների կայացմանը: Լիառույս եմ, որ «էսպես չի մնա», քանզի մենք ունենք ազգային իմաստություն և հոգու արիություն, հետևաբար շուտով վերագտնելու ենք մեզ ու արձանագրելու ենք համագային հաղթանակներ և առաջընթաց: Հայ ժողովուրդը վաղուց՝ հազարամյակներ առաջ է հաստատել, ապացուցել հարատևության իր իրավունքն ու արտոնաթուղթը:

**Հարցազրույցը՝
Մեղրի ՂՈՒԿԱՍԵԱՆԻ**

Պատառիկներ հավատացյալի օրագրից,

կամ՝ ստեղծագործությունը հոգու ազատագրումն է

Եր ազգի ինքնագիտակցությունը ձևավորվել է քրիստոնեական գաղափարաբանության ճանաչմամբ, ըմբռնումով ու հավատով: Քրիստոս եկավ աշխարհ, սերմանեց գիտակցական ինքնագիտաբերման գաղափարը, և ինքն անձամբ զոհաբերվեց խաչի վրա՝ կրելով մեր մեղքերի ծանր բեռը, փրկելով մեզ Իր համբերատար ու անտրտուն համառությամբ: Ես մի պարզ ու հաստատ ճշմարտություն գիտեմ, որ քրիստոնեությունն այն լույսն է, որ մարդկության դաժան ու արյունալի պատմության ընթացքում առաջնորդել է մեզ՝ փոթորկված օվկիանոսի միջով մեր նավը փրկության ափ հասցնելով...

Հավատը հույս է, լույս է ու կյանք: Երբ ես փոքր էի, մայրս փոքր եղբորս համար, որը, պատահում էր, ուշաթափվում էր, մեր տան պատուհանի գոգին միշտ ճրագ կամ իր ձեռքով պատրաստած մոմ էր վառում ու աղոթում: Տարիներ անցան, նա ապաքին-

վեց, և իմ մեջ տպավորվեց դա: Մայրս հավատի սերմ ցանեց իմ մանկական հիշողության անդաստանում, և սերմն աճեց, ծլարձակեց իմ հոգում: Իմ ցանած սերմերը, սակայն, դժվարությամբ են այսօր աճում անջուր ու տատասկոտ դաշտերում: Որքան զարգանում է կյանքը, այնքան ավելի ինքնավստահ ու հպարտ է դառնում մարդը՝ հեշտասեր ու ամբալ: Մարդը վստահում է իր ուժերին՝ կարծելով, թե այդ ուժն իր ներսից է, սակայն կյանքի փորձություններն ապացուցում են հակառակը: Երբ այլևս չեն լինում ո՛չ ուժ և ո՛չ հույս, Աստված Իր զորեղ աջն է մեկնում, որ քայլենք Իր հետ ու գիտակցենք՝ որտեղից է փոխանցվում ներքին ուժը: Ձարմանալի ոչինչ չկա. Աստված ամենակարող է... Մենք ու մեր երկիրն այսօր կարելի է ենք, բայց Աստված ասում է՝ վեր կացեք ու քայլեք, աղոթեք ու վստահեք ինձ, և ես կբուժեմ Ձեզ ու Ձեր երկիրը....

Երբ ես սգի մեջ էի՝ որդուս զոհվելուց հետո, չգիտեի՝ ինչպես տանել այդ ծանր վիշտը: Ցավս մեղմացնող ոչինչ չկար... Բոլորն ինձ հետ էին՝ ժողովուրդը, հարազատներս, ընկերներս, սփոփանքի խոսքեր էին հեղում ինձ վրա, բայց ամօգուտ: Եվ ահա Աստված իմ սենյակ մտավ գիշերով և ինձ տարավ ճշմարիտ ճանապարհով՝ ամոքելով հոգիս Իր կենարար խոսքով և դուրս բերելով ինձ այդ մղձավանջից:

Փոքր ժամանակ, երբ վազում էիմբ գյուղամիջի ակունքի պատուհանից կիճո դիտելու, հիշում եմ՝ անձրևից հետո տունդարձի ճանապարհին մշմարվում էին ցեխի մեջ կայծ տվող լուսատուկներ, և զարմանում էիմբ մանկան հայացքով՝ ինչպես են նրանք լույս տալիս: Իսկ որքան պայծառ է այն լույսը, որ ճառագում է հոգուդ մեջ վերևից՝ որպես մանան, լուսավորում միտքդ ու հոգիդ, ջերմացնում մարմինդ: Մենք պարտավոր ենք

փառք տալ Աստծուն, որ լույս է բաշխում մեզ: Երբ ջուր չկա այգին ջրելու, ծառերն սկսում են չորանալ, և եթե այդ ծառերի տակ անգամ փոքր չափով ջուր լցնենք ամեն օր, հավանաբար, ու մրանք կկենդանանան...

Աշխարհն այսօր մեղքերով բարձրված բեռնաձիւն է նման, որ դժվարանում է քայլել, որովհետև սանձը տվել է սատանային, և պետք է հաղթել աշխարհին, ինչպես Տերը հաղթեց: Նա կտա մեզ իմաստություն և պաշտպանվելու տանիք: Թող Տերը երկնային հավասարակշռության մեջ պահի երկիրը և օրերի ցանկուն գրանցի միլիոնավոր փրկվածների անուններ...

Երազանքը վաղ թե ուշ չվում է հավքի նման, սակայն իրականությունն ապրում է մեզ հետ և մեզանից պայքար ու համբերություն է պահանջում: Չգիտեմ՝ որքան է մեր կյանքի տևողությունը, բայց

մեր ամեն վայրկյանի մեջ սիրո և բարության համար տեղ պիտի պահենք, ծաղիկների պես պետք է հոգ տանենք, որ միշտ դալար մնան:

Աշխարհը դարձել է եռացող կաթսա, մարդկանց հիվանդ երևակայությունը թափառում է ամեն տեղ՝ փոթորկված քամու նման: Իմ կյանքի յոթանասունհինգ տարվա ընթացքում ես հասկացել եմ, որ կյանքը տրված է մարդուն ապրելու, հասկանալու, պայքարելու, ճիշտ ճանապարհը գտնելու համար: Մարդու կյանքը նման է անավարտ ու չհամապատասխան ծառի, փոխվել են մարդիկ՝ ցավից, հուսահատությունից, անորոշությունից: Եթե աշխարհի բոլոր մարդիկ Աստված ունենային, կյանքը հրաշք կլիներ: Հոգևոր դաշտն այսօր մնում է կիսադատարկ, և ես շարունակում եմ աղոթել բոլոր անհավատների համար...

Չոյա ՀՈՎՀԱՆՆԻՍՅԱՆ

Հակոբ և Հարություն Հովնաթանյանների որմնանկաչությունը

Նաղաշ Հովնաթանյանի որդիներ Հակոբը ու Հարությունը, զարգացնելով հոր ավանդած արվեստը, այն առանձնահատուկ կատարելության հասցրին: Հովնաթանյանի մահվան տարում (1722 թ.) Հակոբը 30-ամյա երիտասարդ էր, իսկ Հարությունը՝ 15-16 տարեկան մի պատանի:

Հակոբ Հովնաթանյանը (1685-1765) հոր ավագ որդին է, գրել է բանաստեղծություններ, նկարել որմնանկարներ, սրբապատկերներ, դիմանկարներ, ինչպես նաև զբաղվել է մանրանկարչությամբ: Հակոբն իրեն անվանում էր և՛ Նաղաշ, և՛ պատկերահան:

Ծնվել է Շոռոթում և տեղի դպրոցում էլ ստացել է կրթություն: Կրթությունը շարունակել է Թովմաս առաքյալի վանքի դպրոցում, որտեղ սովորել է նաև նկարչություն, իմացել է թաթարերեն և վրացերեն (Ն. Ալիկեան, Հովնաթան Նաղաշ և Նաղաշ Հովնաթանյանը, Վիեննա, 1911, էջ 61): Հակոբը դեռ հոր կենդանության ժամանակ կարողացել է ինքնուրույն ստեղծագործել և բախտ է ունեցել երեսունյոթ տարի ապրել հոր կողքին, սովորել նրանից և՛ գրել, և՛ նկարել (Ե. Մարտիրոսյան, Հայկական կերպարվեստի պատմություն, Ե., 1981, էջ 81):

Երկար ժամանակ հոր հետ աշխատանքում մնալով՝ յուրացրել է Հովնաթանյանի արվեստը և նրա մահվանից հետո սեփականացրել է Նաղաշ պատվանունը:

1715 թ. Նաղաշ Հովնաթանյանը Աստվածատուր Համադանցին հրավիրել է Էջմիածին՝ պատկերներ կատարելու: Հակոբը հոր հետ միասին գնացել է Էջմիածին, նկարել մի քանի պատկեր և օգնել Մայր տաճարի որմնագործերի նկարման գործում: Ստորագրությունների բացակայության պատճառով դժվար է զանազանել նրա գործը, բայց ելակետ ընդունելով Սիմեոն Երևանցու ցուցակը և այդ շրջանում արված նկարների ոճը՝ կարող ենք առանձնացնել մի քանի գործ, որոնք տարբերվում են Նաղաշ Հովնաթանյանի աշխատանքներից, և վերագրել Հակոբին: Դրանցից են «Հայկ Նահապետ», «Տրդատ, Աշխեն և Խոսրովի դուկատ» որմնանկարները, որոնք Դուկաս կաթողիկոսի կատարած վերանորոգությունների ժամանակ ամբողջ պատի ծեփի հետ միասին առանձնացվել և պահվել են (Ե. Մարտիրոսյան, Հայկական կերպարվեստի պատմություն, էջ 82): Հակոբ Հովնաթանյանին պետք է վերագրել նաև «Աբ. Հռիփսիմեն» և «Աբ. Գայանեն» սրբապատկերները:

Երբ Էջմիածնում օգնում էր հորը՝ 1715-1720 թթ., Հակոբն անկասկած կրճնել է նաև այլ պատկերներ, քանի որ այդ շրջանում արված գործերը շատ-շատ են եղել, և հնարավոր չէ, որ Նաղաշը միայնակ այն ստեղծած լիներ: Հակոբը հոր հետ աշխատել է նաև այլ եկեղեցիներում: Նաղաշի մահից հետո Հակոբն սկսել է աշխատել կրտսեր եղբոր՝ Հարությունի հետ:

1720 թ. Աստվածատուր Համադանցին մարմարապատել է Էջմիածնի Մայր տաճարի ավագ խորանի ճակատը: Նրա կաթողիկոսության օրոք այդ պատի վրա պատկերներ չեն եղել, ավելի ուշ նկարվել են Աստվածամոր և տասներկու առաքյալների պատկերները: Հիմք ունենալով Սիմեոն Երևանցու «Ջամբռը», որտեղ ասվում է. «Կարապետ Ունեցին ետ նկարել զպատկերս երկուստսան առաքելոցն ի ճակատ ավագ խորանին եւ ետ ծաղկել ոսկեգոծ եւ գեղեցիկ գունոք» (Սիմեոն Երևանցի, Ջամբռ, Վաղարշապատ, 1873, էջ 28), կարող ենք ապացուցված համարել, որ այդ պատկերները կատարվել են 1726-1729 թթ. զահակալած Կարապետ Բ Ունեցու հանձնարարությամբ: Պատկերների ոճը պատկանում է Հովնաթանյանների ընտանիքին: Կարապետ Բ Ունեցու կաթողիկոսության տարիները համընկնում են Հակոբ Հովնաթանյանի գործունեության հետ, և հաշվի առնելով այն փաստը, որ Հակոբը հոր հետ աշխատել է Էջմիածնում, մնում է եզրակացնել, որ այդ պատկերներն սկսել է նկարել Նաղաշ Հովնաթանյանը, ապա շարունակել են որդիները:

Պատկերները հորիզոնականով զբաղեցնում են պատի ամբողջ լայնությունը: Կենտրոնում պատկերված է Աստվածամայրը Մանկան հետ, նրանցից աջ ու ձախ՝ վեցա-



Աբ. Գայանեն և Աբ. Հռիփսիմեն, հեղինակ՝ Հակոբ Հովնաթանյան

կան առաքյալ, իսկ պատի ծայրերին տեղավորված են Ստեփանոս և Փիլիպոս սարկավագների պատկերները: Պատկերների ոճը վկայում է, որ Աստվածամոր և առաքյալների պատկերները նկարված են Հակոբի ձեռքով, իսկ սարկավագները՝ ավելի պակաս փորձի տեր այլ նկարիչ:

Հակոբը եղբոր՝ Հարությունի հետ Երմջակի Սուրբ Կարապետ վանքում զարդանկարներ և սրբերի պատկերներ է նկարել: Վանքի խորանի վրայի պահարանի մեջ փորագրված է. «ՌԵՅԹ ԹՈՒՆ ՍՈՒՐԵ ՍԵՂԱՆՆ ԾԱՂԿԵՍԱՆ ԺԵՆԱՄԵ ԶՈՎՆԱԹԱՆԻ ՈՐԴՈՒՅ ԶԱՅԿԻՄ ԵՆ ԶԱՐՈՒՔԻՆԻՆ: ՈՒՐԵՆՆ յԻՉԵՍԻՑԻ Ի ԲԱՐԻՆ ԵՆ ԴՈՒՔ յԻՉԵԱՎ ԻՆԵՔ Ի ՔՐԻՍՏՈՍԻ» (Մերսոպարք. Սմբատեանց, Նկարագիր Սուրբ Կարապետի վանքի Երմջակայ և շրջակայից նորա, Թիֆլիս, 1906, էջ 15):

Մեղրիի Մեծ թաղի հյուսիսարևմտյան հատվածում է գտնվում դեռևս 13-րդ դարից հիշատակված Անապատանաց վանքը (Մեղրիի վանք), որից մնացել են միայն 17-րդ դարում կառուցված Ս. Հովնանես Մկրտիչ եկեղեցին և կիսաբամբուլ մախսարահ-գավիթը: Եկեղեցու ներսը որմնանկարվել է նվազագույնը երկու անգամ՝ 1745 և 1793 թթ.: Ավագ խորանում՝ որմնախորշերի երկու շարքերը բաժանող քիվի վրա, պահպանվել են նաև զարդագույն ու զուգահեռաձև երկու տեսակի նկարներ, որոնց կցված են ավելի փոքր երկնագույն ծաղիկներ: Ժամանակակից առումով 1745 թվականը համապատասխանում է Հակոբ և Հարություն Հովնաթանյանների ստեղծագործության ակտիվ շրջանին, այնպես որ կարելի է ենթադրել, որ Անապատանաց վանքի հին շերտի որմնանկարները ևս ստեղծել են նրանք (Ն. Ավետիսյան, Մեղրիի Անապատանաց վանքի որմնանկարները, Լրաբեր հասարակական գիտությունների, № 3, 2019):

Հակոբ Հովնաթանյանն ապրել է ութսուն տարի: Նա նաև զբաղվել է մանրանկարով և ձեռագրերի պատկերազարդումով:

Հարություն Հովնաթանյանը (1700-1780) ընթացել է հոր և եղբոր ուղիով: Այն, որ նա Նաղաշի կրտսեր որդին էր, իմանում ենք հետևյալ տողերից. «Կարօտ մնացի շնորհացդ եւ բանից, եւ եւ Զարուքին փոքրիկ պատանիդ» (Նաղաշ Հակոբ, Բանաստեղծություններ, էջ 215): Հարությունը ծնվել է Շոռոթում: Տեղի դպրոցից հետո կրթություն է ստանում Աբ. Թովմաս առաքյալի վանքում և դառնում հոգևորական:

Հարությունը վստահաբար, բացի հորը և եղբորը օգնելուց, նաև ինքնուրույն է աշխատել, սակայն, ցավոք, այժմ նրա կյանքի և գործունեության մասին հայ գրական մամուլում և արխիվային նյութերում քիչ տեղեկություններ են պահպանվել:



Հարությունի աշխատանքներից հայտնի է մեկ ձեռագիր «Քարոզգրքի» ձևավորում: Քարոզգրքի ծաղկանկարները շքեղ են՝ գունային հարուստ երանգավորմամբ: Լուսանցազարդերն ու զվեստառերը հիշեցնում են ժամանակի ձեռագիր և տպագիր մախազարդերը, չնայած այս ամենին՝ զգացվում է Հարությունի անհատականությունը: Նա ճաշակ է ցուցադրում էջը կառուցելիս և գույների ընտրությամբ ժամանակ (Մ. Ղազարյան, Հայ կերպարվեստը XVII-XVIII դարերում, Ե., 1974, էջ 167):

Հայտնի է նաև Հարություն Հովնաթանյանի Կ. Պոլսում կատարած Ղազար Զահեկեցու երգարանի գեղեցիկ գրչությունը (Գ. Լևոնյան, Հովնաթանյան Նաղաշները հայ նկարչության պատմության մեջ, «Խորհրդային արվեստ», 1938, № 2, էջ 52):

Հովնաթանյան եղբայրներն իրենց ողջ կյանքում միասին են աշխատել, երկուսով նկարազարդել են մի «Յայսմաուրք», նրանց մոնումենտալ աշխատանքներից են Աստապատի Աբ. Ստեփանոս վանքի որմնանկարները: Հակոբ և Հարություն Հովնաթանյանների կարևոր աշխատանքներից են նաև Ղազարապատ հյուրանոցը և Մայր Աթոռի Հին Վեհարանը: Նրանք կատարել են նաև հաստոցային աշխատանքներ, ընդ որում՝ հայ իրականության մեջ հենց նրանք են առաջինը լիարժեքորեն օգտագործել յուղաներկը:

Հարությունի և Հակոբի միասին կատարած գործերից առաջինը Երևանի Մատենադարանի № 1533 «Յայսմաուրքն» է («Հարություն և Հակոբ Հովնաթանյանների նորահայտ մանրանկարները», «Գրական թերթ», Երևան, 1961, № 9): Այն բաղկացած է 509 թերթից, 240 և ավելի դիմանկարից, 220 կոմպոզիցիոն աշխատանքից և մի շարք զարդանախշերից:

1740 թ. մարտի 3-ին Մկրտիչ եպս. Զահեկեցին դիմում է Նախիջևան քաղաքի և շրջակա գյուղերի բնակիչներին օգնություն ցույց տալ Երմջակի Աբ. Կարապետ վանքը նկարազարդելուն (Մերսոպարք. Սմբատեանց, մշվ. աշխ., էջ 465): Նա օրհնության գրով հրավիրում է Հակոբ և Հարություն Հովնաթանյաններին վանքը նկարազարդելու: Օրհնության գրի մեջ հիշատակվում է նաև Նաղաշ Հովնաթանյանը: Հավանաբար Մկրտիչ եպս. Զահեկեցուն հայտնի չի եղել Նաղաշ Հովնաթանյանի մահը:

Հակոբ և Հարություն Հովնաթանյանների որմնանկարչական աշխատանքների հետքերը պահպանվել են նաև Ազնաբերդի Աբ. Գրիգոր եկեղեցում (Ն. Ավագյան, Զմաբերդի ս. Գրիգոր եկեղեցու որմնանկարները, «Բանբեր Երևանի համալսարան», թիվ 1, 1977, էջ 246-252): Խորանի կամարների, դահլիճի հարավային պատի, ավանդատների մուտքերի վերին մասերի, բեմի ճակատի (12 առաքյալների դիմապատկերները), խորանի և չորս մույթերի վրայի երկու տասնյակից ավելի կոմպոզիցիոն ու ավետարանական

աշխատանքները եզրված են տերևներով ու ցողուններով, ծաղկազարդերով և առնված են սև եզրագծերի մեջ (Ն. Ավագյան, Նախիջևանի որմնանկարչական արվեստը, էջ 67):

Անկասկած, Հովնաթանյան դպրոցին են պատկանում Գողթնի և շրջակա վայրերի մի քանի եկեղեցիների հին որմնանկարները և մեծ թվով ամանուն սրբապատկերներ (Գ. Լևոնյան, Հովնաթանյան Նաղաշները հայ նկարչության պատմության մեջ, «Խորհրդային արվեստ», 1938, № 2, էջ 52):

Թբիլիսիի Սուրբ Գևորգ եկեղեցին 2013-2015 թթ. վերանորոգվել է, և ուշ շրջանում արված որմնանկարների շերտի տակ բացահայտվել են Հովնաթանյանների փառահեղ աշխատանքները: Դրանց մեծ մասը մնացել էր մրի հաստ շերտի տակ: Ուսումնասիրությունները ցույց են տալիս, որ 200 թմ պահպանված պատկերները եկեղեցու որմնանկարների մի փոքր մասն են միայն, և որ տաճարն ամբողջովին պատված է տարբեր ժամանակաշրջաններում արված որմնանկարներով: Սբ. Գևորգի որմնանկարները դեռ խոր ուսումնասիրության կարիք ունեն, բայց արդեն այսօր արվեստագետները հակված են մտածելու, որ դրանց զգալի մասը պատկանում է Հովնաթանյանների վրձնին:

Մայր Աթոռի՝ 21-րդ դարի առաջին քսանամյակի գործունեությունն առավել աչքի է ընկնում լայնամասշտաբ շինարարությամբ, որի մեջ առանձնահատուկ է եկեղեցաշինությունը: 21-րդ դարի եկեղեցաշինության թագն ու պսակը Մայր տաճարի ներկայիս հիմնանորոգությունն է, որն սկսվել է դեռևս 2012 թվականին: Մայր տաճարի վերանորոգմամբ զբաղվել են բազմաթիվ հայրապետներ, սակայն այն ծավալով և հիմնավորությամբ, որով արվում է ներկայիս հիմնանորոգությունը, երբևէ չի արվել: Տաճարի վերականգնողական ընթացիկ աշխատանքների ժամանակ որմնանկարների թաքնված շերտեր են գտնվել: Դրանք պատկերված են տաճարի 4 անկյուններում գտնված աղյուսաշեն կեղծ թաղերի վրա: Աշխատանքների առաջին փուլում վերականգնող նկարիչները 1950-ականներին արված որմնանկարների շերտերն են վերականգնել, նոր բացահայտված շերտն ավելի արժեքավոր է և ամենայն հավանականությամբ արվել է 1715 թ.: Սրանք այն Նաղաշ Հովնաթանյան իր որդիներ Հակոբի և Հարությունի հետ: Հովնաթան Հովնաթանյանն արդեն 1800-ականների սկզբին կատարել էր նոր շերտի կազմում, բայց, ցավոք սրտի, որպես հիմք արված կրաշաղախի շերտը շատ թույլ է և անկայուն: Դա է եղել պատճառը, որ 1900 թթ. որոշել են ամբողջ նկարները թափել և ստեղծել նոր որմնանկարներ: Տաճարի հարավարևմտյան մասում գտնված որմնանկարը հնարավոր է ամրակայել և ցուցադրել: Որմնանկարի ներկի շերտը կատարված է տեմպերային տեխնիկայով, ոսկեգույնը բավականին լավ է պահպանված, կարմիր և կանաչականատալուն շերտերը թույլ են: Բացահայտված շերտի տակից նոր շերտ է բացվում, դրանք գծային լուծումներ են, որոնք խաչվող թաղերում ամեն միստի վրա կազմում են քառաթև խաչ: Առաջին նկատելի շերտը 1954-1955 թթ. վերականգնման աշխատանքների արդյունքն է, իսկ նախորդ շերտերը՝ Հովնաթանյանների: Աշխատանքներ են տարվում տաճարի հարավարևմտյան կամարի տակ ի հայտ եկած որմնանկարի շերտն ամբողջացնելու համար, գունային լրացումներ կատարելով՝ փորձագետները փորձում են շարունակել Հովնաթանյանների գործը: Աշխատանքները կատարվում են Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի օրհնությամբ:

Հակոբ և Հարություն Հովնաթանյանների գործը շարունակելու և հայ գեղանկարչությունը մի նոր աստիճանի բարձրացնելու դերը վիճակված էր Հովնաթանյան տոհմի հաջորդ սերունդներին:

Հայաստանում գործող հիմնական աղանդները և դրանց փոփոխությունները

← էջ 5

Պետականության հիմքերի խարխվածան առումով առավել վտանգավոր է *Եհովայի վկաներ* աղանդավորական կազմակերպությունը, որը ՌԴ Գերագույն դատարանի որոշմամբ 2017 թ. ճանաչվեց ծայրահեղական: Նրանց գործունեությունը Ռուսաստանում արգելվեց, իսկ ունեցվածքը բռնագրավվեց: Ռուսաստանում Եհովայի վկաներ աղանդի գործունեության արգելքից հետո մամուլում տեղեկատվություն հայտնվեց, որ կազմակերպության ռուսաստանյան մասնաճյուղի ֆինանսական և մարդկային ռեսուրսների ներհույս է սպասվում դեպի հետխորհրդային այլ երկրներ, նաև Հայաստան:

Բոլոր աղանդներին հատուկ խիստ վերահսկողությունը միայնակ ցկատմամբ առավել բնորոշ է Եհովայի վկաներին: Նրանք գործեք երբեք մենակ չեն լինում, շրջում են խմբով, քարոզում գոնե մեկ գաղափարակից ընկերոջ հետ՝ այդպիսով վերահսկելով միմյանց:

Աղանդավորական կառույցներն ունեն խիստ կազմակերպչական օրենքներ, որոնք օգնում են առաջնորդներին ուշիուշով հետևել իրենց հոսի անդամներին: Կառույցների անխափան աշխատանքի համար շատ կարևոր է հնազանդությունը, առանց որի համայնքը չի գոյատևի: Աղանդներում ընդհանրապես չի խրախուսվում ինքնուրույն մտածելը, սեփական կարծիքն արտահայտելը: Եհովայի վկաները ընդունված կանոններից շեղվողներին աստիճանաբար մեկուսացնում են, ու եթե չի խրատվում, «կտրում են», այսինքն՝ հեռացնում են «Եկեղեցուց»: Արգելվում են կտրվածի մեկուսացումը, աստիճանաբար մեկուսացնում են, ու եթե չի խրատվում, «կտրում են», այսինքն՝ հեռացնում են «Եկեղեցուց»: Արգելվում են կտրվածի մեկուսացումը, աստիճանաբար մեկուսացնում են, ու եթե չի խրատվում, «կտրում են», այսինքն՝ հեռացնում են «Եկեղեցուց»: Արգելվում են կտրվածի մեկուսացումը, աստիճանաբար մեկուսացնում են, ու եթե չի խրատվում, «կտրում են», այսինքն՝ հեռացնում են «Եկեղեցուց»:

Ժամանակակից աղանդների բոլոր «մարգարեությունները», որպես կանոն, վերաբերում են Քրիստոսի երկրորդ գալստյանը: Այս առումով ևս շատ առաջ են անցել Եհովայի վկաները: Նրանք անդադար քարոզում են աշխարհի վերջը, իբրև մարդիկ ապրում են «վերջին օրերում»: Ըստ նրանց՝ Արմագեդոնը վերապրելու և դրախտում ապրելու հույս կարող են ունենալ միայն նրանք, ովքեր ապրում են Աստվածաշնչի համաձայն: Եվ քանի որ, ըստ Աստվածաշնչի, ապրում են միայն Եհովայի վկաները, ապա մահանալուց հետո հարություն առնելու հնարավորությունն ընծեվում է միայն իրենց:

Եհովայի վկաների առաջնորդներն արդեն մի քանի անգամ մարգարեություն են արել աշխարհի վերջի մասին և բնականաբար սխալվել: Օրինակ՝ 1914-ին, 1918-ին, 1925-ին, երբ, ըստ նրանց, հարություն պետք է առնեին և երկիր վերադառնային Աբրահամը, Իսահակը, Հակոբը և այլ մարգարեներ: Սակայն, ի տարբերություն այլ աղանդների, որոնք աշխարհի վերջը գուշակելիս ընդունում են, որ սխալվել են, Եհովայի վկաները միշտ արդարանում են և տարբեր բացատրություններ գտնում սխալ հաշվարկի համար: Ավելին՝ Եհովայի վկաների աղանդի հիմնադիր Ռասելը, չհաշտվելով երկրորդ գալստի հետ կապված իր չիրականացած «մարգարեության» հետ, յուրովի հաշվեհարդար տեսավ

քրիստոնեության հետ: Նա իր յոթ հատորյա երկերում Աստվածաշնչից հանեց իր համար անընդունելի բոլոր գաղափարները և հիմնեց «Սուրբ գրքի ուսումնասիրությունների» իր ընկերությունը:

Անդադար քարոզելով աշխարհի վերջը՝ Եհովայի վկաներն ստեղծում են վախի, անվստահության և հուսահատության մթնոլորտ: Այսինքն՝ աշխարհի վերջի հանդեպ վախ ներշնչելն է նրանց նպատակը: Փողոցում պատահական անցորդներին մոտեցող միշտ նույնաբովանդակ հարցերով են սկսում իրենց քարոզը: «Գիտե՞ք՝ երբ է լինելու աշխարհի վերջը», «Գիտե՞ք՝ ձեր երեխային ինչ ապագա է սպասում», «Գիտե՞ք՝ ձեզ ինչ դժբախտություններ են սպասում», «Գիտե՞ք՝ ով է վերապրելու Արմագեդոնը» և այսպես շարունակ: Իհարկե, շատերը նրանց չեն էլ փորձում լսել, սակայն ոչ բոլորը: Նման քարոզիչներին երբեք լսած ցանկացած մարդու մեջ կարող են առաջանալ վախեր՝ կապված ապագայի հանդեպ, կամ պազապես տագնապային անհանգիստ վիճակ ստեղծվել: Սա ոչ այլ ինչ է, քան կրոնական գաղափարների ներքո կատարվող մարդու իրավունքների խախտում:

Իսկ ինչո՞ւ են Եհովայի վկաներն այդքան սիրել աշխարհի վերջի և դրան պատրաստվելու գաղափարը: Մշտապես պատրաստ լինելով «վերջին» Եհովայի վկաներն անմաստ են համարում ցանկացած նյութական հարստություն: Աշխարհի վերջին սպասող մարդու համար ոչ մի արժեք չունեն աշխատանքը, ընտանիքը, մասնագիտացումը: Եվ աշխարհի վերջից առաջ նրանք վաճառում են իրենց ունեցվածքը, տները և ամբողջ գումարը փոխանցում կազմակերպության ղեկավարներին: Բազմաթիվ են դեպքերն ամբողջ աշխարհում և նաև Հայաստանում, երբ Եհովայի վկաները, սպասելով աշխարհի վերջին, վաճառել են իրենց ողջ ունեցվածքը, փոխանցել ղեկավարներին և սպասել: Սակայն ոչ թե աշխարհի, այլ իրենց համար նորմալ կյանքի վերջն է եկել, դարձել են անտուն և անգործ:

Ընդհանրացնելով՝ կարելի է առանձնանշել Եհովայի վկաների աստվածաբանության մի քանի առավել ուշագրավ սկզբունք:

Հիսուսն Աստված չէ, այլ մարդ, բայց ամենամեծ մարդը, որ երբևէ եղել է աշխարհում: Սուրբ Գրքերում «Աստված» բառը պարզապես փոխարինված է «Եհովա» եբրայեցական քառագրով (տետրագրամով): Այդ Եհովային էլ վերագրվում են Սուրբ Հոգու և Որդու գործունեությունները: Արմագեդոնն էլ մեկնաբանվում է որպես պատերազմ Քրիստոսի Եկեղեցու և բոլոր ոչ վկաների դեմ:

Եհովայի վկաները չեն նշում Ամառը, Սուրբ Ծնունդը, ծննդյան օրերը և շատ այլ տոներ ու տոկոսություններ՝ համարելով դրանք հեթանոսական ծագում ունեցող: Չեն մասնակցում ընտրություններին, պատիվ չեն տալիս պետական դրոշմի:

Եհովայի վկաներն ունեն նաև շատ ավելի վտանգավոր հանդգնություններ: Դրանցից հարկ է առանձնացնել գինեգործական ծառայությունից հրաժարվելը, որի փոխարեն որոշ երկրներում՝ այդ թվում Հայաստանում, գորակոչման ենթակա Եհովայի վկաներն իրականացնում են այլընտրանքային աշխատանքային ծառայություն: Առավել վտանգավոր է ոչ

այնքան բանակում ծառայել կամ չծառայելը, որքան դարավոր ոսոխին թշնամի չհամարելը: Եհովայի վկաները հավասարության մշակ են դնում բոլոր մարդկանց միջև՝ անկախ ազգից, դեմ են ցանկացած պատերազմի: Սա իրոք ստեղծում է իրական վտանգ անվտանգային լուրջ մարտահրավերների առջև կազմած մեր երկրի համար: Այսինքն՝ ցանկացած Եհովայի վկա հավանական դասալիք է, մարդ, որը չի պաշտպանել իր երկիրը վտանգի ժամանակ:

Եվս մեկ վտանգավոր թեգ՝ առաջ քաշված Եհովայի վկաների կողմից. նրանք հրաժարվում են ամբողջական արյան և դրա հիմնական բաղադրամասերի՝ էրիթրոցիտների, լեյկոցիտների, թրոմբոցիտների և պլազմայի փոխներարկումից՝ անկախ հիվանդի տարիքից և առողջական վիճակի ծանրությունից: Նրանց համայնքի անդամներին արգելված է արյուն տալ՝ ուրիշներին ներարկելու, և պահեստավորել սեփական արյունը՝ իրենց իսկ ներարկելու համար:

Հայաստանում անխափան գործում է և բազմաթիվ հետևորդներ ունի նաև «Կյանքի խոսքը» կոչված աղանդը՝ իրենց ավետարանչական հավատքի քրիստոնյաներ համարող «Եկեղեցին»:

Համացանցում մասնավորապես «YouTube» հարթակում, կարելի է հանդիպել «Կյանքի խոսքը» աղանդի բազմաթիվ տեսանյութերի: Աղանդը իր գոյության շուրջ 30 տարվա ընթացքում համայնքներ է ձևավորել Հայաստանի տասնյակ քաղաքներում և գյուղերում, ինչպես նաև արտերկրում: Աղանդի պատերազմից հետո իր հավատացյալների հետ հերթական հավաքի ընթացքում խոսում է, ինչպես ինքն է ձևակերպում, «Դարաբաղի վրայի անեծքի» մասին: Հենց այս վերնագիրն էլ կրում «YouTube»-ում տեղադրված տեսանյութերից մեկը: Իր քարոզի ընթացքում պատերազմը բացառում է պատմում է այն մասին, որ Դարաբաղի հողի վրա 25 տարի է՝ մի անբացատրելի անեծք կա, որ այդ հողը այդքան արյուն խմելուց հետո էլի է ուզում և չի կշտանում: Եվ առաջարկում է գնալ ու այդ անեծքը հանել: Նաև խոսում է այն մասին, որ հայ ընտանիքում տղա զավակի ծնունդն ավելի շատ մտահոգություն է առաջացնում: Իրենց զավակներին փրկելու, այսինքն՝ Դարաբաղից ազատելու համար ծնողներն ստիպված արու զավակին արտասահման են «փախցնում»: Եվ վերջում, որպես մխիթարանք, ավետում է, որ այժմ այդ վախից իրենց դուրս են եկել, Դարաբաղի ժողովուրդն այդ ամենը սիրում է, թող ինքն էլ իր հողի համար պայքարի:

Առհասարակ, հետխորհրդային երկրներում տասնամյակներ տևած աթեիզմից հետո մեծ հետաքրքրություն կա հոգևոր կյանքի նկատմամբ: Երբ խորհրդային հասարակարգին բնորոշ աթեիզմը մերժվեց, դրական համարվեց հավատքի ցանկացած դրսևորում՝ առանց էական տարբերության կրոնների միջև, և սրանից օգտվեցին աղանդավորական շարժումների հիմնադիրները՝ կրոնական ու հոգևոր զարգացման քողի տակ հետխորհրդային երկրներում տարածելով սեփական իշխանությունը: Հայաստանում աղանդավորների ներթափանցումը մեծ թափ ստացավ հատկապես 1988 թ.

Սպիտակի ավերիչ երկրաշարժից հետո. Հայաստանի առաջին մախագահ Լևոն Տեր-Պետրոսյանը մոտքի արտոնագիր տվեց մորմոն միլիարդատեր Ջոն Հանթսման-կրոսերին, Հայաստանում սկսեց գործել նաև ԱՄՆ-ի մախագահ Ռոնալդ Ռեյգանի կողմից բարեգործական հիմնադրամի անվան տակ ստեղծված «Ժողովրդավարության ազգային հիմնադրամը»՝ NED-ը, որն առաջնորդում է աղանդավորական բոլոր կառույցները: Դա կարելի էր ընկալել որպես բարի կամքի դրսևորում, սակայն իրականում կրոնական հանդուրժողականության քողի տակ խորհրդային ամբողջատիրական (տոտալիտար) հասարակության համար խորթ երևույթներ էին քարոզվում, ինչպես միասեռականությունը, միասեռական ամուսնությունները, թմրամոլությունը: Այս քարոզների վերջնականատակն այդ երկրների տնտեսական, քաղաքական ու հոգևոր-մշակութային հիմքերը քանդելն է:

Ամփոփելի է կրոնական աղանդների դերը նաև համաշխարհային հեղաշրջումների գործում: Ժամանակակից աշխարհին հայտնի են աղանդավորական մի շարք շարժումների հետևորդ հեղափոխական առաջնորդներ, ինչպես ուկրաինական մայրամի հեղափոխության ամենակարկառուն ղեկավար, «Ժողովրդական ճակատ» կուսակցության քաղխորհրդի ղեկավար Արսեն Յացենյուկը, որը անթուղիական է եկեղեցու անդամ է:

Կամ, օրինակ, Վրաստանում վարդերի հեղափոխության ժամանակ ակտիվ դերակատարություն ունեցավ «Հավատքի խոսք եկեղեցին»՝ ընտրություններից հետո ստանալով մախարարի հինգ աթոռ:


Դատելով 2014-ի հունիսին Ադրբեջանում Եհովայի վկաների աղանդի անդամների զանգվածային ձերբակալությունների մասին հաղորդագրություններից՝ այդ մուսուլմանական երկրում էլ արևմտյան մեծամասնի աղանդները հասցրել են խոր արմատներ ձգել: Այնպես որ գործ ունենք համակուկայան իրավիճակի, այլ ոչ միայն տարածաշրջանի քրիստոնյաների դեմ ոտնձգության հետ:

Ապակառուցողական պաշտամունքների գոհերի օգնության և վերականգնման կենտրոնի ղեկավար Ալեքսանդր Ամարյանի բնութագրմամբ՝ աղանդն առաջին հերթին իշխանություն է և փող: «Գումարները բաժին են հասնում աղանդների ղեկավարներին, իսկ աղանդների նկատմամբ իշխանությունից օգտվում են քաղաքական կուսակցությունները: Աղանդավորները քաղաքական ուժերի համար ընտրազանգված են»,— համարում է նա ու հավելում, որ աղանդավորների դասագրքերի մեծ մասը՝ մոտ 90 տոկոսը, նման է անվտանգության ծառայությունների ձեռնարկների: Ամարյանի համոզմամբ՝ աղանդների անդամներին հավաքագրում են, կեղծիքով ներքաշում, բռնի կերպով պահում հոգեբանական ազդեցության տակ:

Ազգակրոնյան այս աղանդների դեմ Հայ Առաքելական Եկեղեցին պայքարում է տարբեր եղանակներով: Կարելի է ասել, որ Եկեղեցու յուրաքանչյուր սպասավոր զինվոր է այս պայքարում: Աղանդավորների հսկայական բանակը թվապես մի քանի անգամ գերազանցում է Հայ Առաքելական Եկեղեցու սպասավորներին: Այստեղ իր դերն ունի նաև այն հան-

գամանքը, որ Հայ Առաքելական Եկեղեցու հետևորդները չեն պարտադրում իրենց հայացքները շրջապատին, մինչդեռ ամեն մի շարքային աղանդավոր իր գործի գիտակ է և ջերմեռանդորեն քարոզում է իր կրոնական հայացքները: Եթե հաշվի առնենք նաև նրանց ֆինանսական, նյութական հնարավորությունները, որոնց թիվում կանգնած են գլխավորապես ԱՄՆ-ը և հավաքական Արևմուտքը, ապա համակարգային պայքարը պետության ներգրավմամբ դառնում է հրամայական:

Հերմինե ՍԱՀԱՅԱՆ



ՏՕՆՔ ԵՒ
ՅԻՇԱՏԱԿՈՒԹՒՒՆՔ
30ԽԻՍ
† ՊԱՅԾԱՆԱԿԵՐՊՈՒԹԻՒՆ
ՏԵԱՆՍ ՄԵՐՈՅ
ՅԻՍՈՒԽ ՔՐԻՍՏՈՍԻ
(ՎԱՐՈՎԱԿԱՐ) — յուլիս 7

ՔՐԻՍՏՈՆՅԱՆ
ՀԱՅԱՍՏԱՆ
Կրոնական, մշակութային,
լրատվական երկշաբաթաթերթ
Հիմնադիր՝
Մայր Աթոռ Սուրբ Էջմիածին
Հրատարակիչ՝
«Քրիստոնյա Հայաստան»
թերթի խմբագրություն
Գլխավոր խմբագիր՝
Նարինե Հովհաննիսյան
Գրանցման վկայական՝ 624
Խմբագրության հասցեն՝
Մայր Աթոռ Սուրբ Էջմիածին
Հեռախոս՝ (010) 517 280
Էլ. փոստ՝
qristonyahayastan1@gmail.com
qristhay@etchmiadzin.am
web կայք՝
krishayas.wordpress.com
etchmiadzinlibrary.am/en/
kristonya-hayastan
Ստոր. տպագր. 3.07.2024 թ.
Տպաքանակը՝ 1265